

JOHN 1.

GOSPEL JOHN.

1 Kε eritöñö Ikö odu, Ikö önyuñ odu ye Abasi, Ikö
2 önyuñ edi Abasi. Kpa Enye odu ye Abasi ke eritöñö.
3 Oto ke Enye ënam kpukpru ñkpö ; ndien mitoho ke Enye
4 inamke ñkpö baba kiet eke ënamde. Uwem odu ke Enye ;
5 ndien uwem oro edi uñwana owo. Ndien uñwana ayama ke
6 ekīm ; ekīm inyuñ ikanke enye. Owo kiet ekedi, Abasi
7 öködöñ enye, enyiñ esie ekere John. Enye edi nte ntiense,
man enye edi ntiense uñwana, kpañ oto ke enye kpukpru
8 owo ëkpenīm ke akpanikö. Enye idige uñwana oro, edi
9 *edi* man edi ntiense uñwana. Oro edi ata uñwana, emi
añwañade kpukpru owo kiet kiet, emi ëdukde ke ere-
10 rimbót. Enye odu ke ererimbót, ënyuñ ënam ererimbót
11 oto ke Enye, ndien ererimbót idiöñöke Enye. Enye
etiene oruk Esiemö, ndien mö emi ëdide oruk Esiemö
12 inyīmeke Enye. Edi adaña owo nte ënyīmede Enye,
Enye önö mö unen ndidi nditö Abasi, *kpa* mö emi ënimde
13 enyiñ Esie ke akpanikö : emi ëmanade, itoho ke iyīp,
inyuñ itoho ke erinyīme öbukidem, inyuñ itoho ke erinyīme
14 owo, edi oto ke Abasi. Ndien Ikö akabare edi öbukidem,
önyuñ oduñ kotu nyīn (ndien nyīn ikokut uböñ Esie, uböñ
nte eke eribon Eyen Ète kierakiet), öyöhö ke mfön ye
15 akpanikö. John etiñ ikö ntiense abaña Enye, önyuñ

JOHN 1.

- ofiori ete, Edi Enye emi ke ami ñkabaña nte, Enye emi etienede mi ke edem ama akabare edi ebe-iso mi : koro
- 16 Enye ekebemde mi iso odu. Koro oto ke uyöhö Esie
- 17 kpukpru nyin imenyene, mfön ke mfön. Koro ekenöde ibet ke ubök Moses ; mfön ye akpanikö edi ke Jesus
- 18 Christ. Baba owo kiet ique Abasi ndomo ini kiet ; Eribon Eyen kierakiet, emi odude ke ikpanesit Ète, Enye ama ayarare *Enye*.
- 19 Ndien emi edi ikö ntiense John, ke ini Me-Jew edöñde me-oku ye me-Levite èto ke Jerusalem ètiene Enye
- 20 èbup enye, ète, Afo edi anie ? Ndien enye onyime, inyuñ ikañke ; enye önyuñ ayarare ete, Ami ndige Christ.
- 21 Ndien mö èbup enye, ète, Nso ndien ? Me afo edi Elijah ? Ndien enye ödöhö ete, Ami ndige. Me afo edi prophet
- 22 oro ? Ndien enye öbörö ete, I'ih. Ntem mö ödöhö enye, ète, Afo edi anie ? man nyin ida ibörö isök mö emi
- 23 edöñde nyin. Afo ödöhö didie abaña idemfo ? Enye ödöhö ete, Ami ndi uyo andifiori ke desert, ete, Èneñere
- 24 usuñ Jehovah, kpa nte Isaiah prophet ödöhöde. Ndien
- 25 mö oro èkedöñde èto ke Me-Pharisee. Ndien mö èbup enye, ète, Nsinam afo onimde baptism ndien, ke afo
- 26 mudige Christ, me Elijah, me prophet oro ? John öbörö mö, ete, Ami 'nīm baptism ke möñ : owo kiet ada ke uföt
- 27 mbufo, emi mbufo midiöñöke, *kpa* Enye emi etienede mi ke edem, emi ami mendotke nditat uruk ikpa-ukot Esie.
- 28 Èkenam me-ñkpö emi ke Bethany ke edem Jordan oko, ke ebièt eke John onimde baptism.
- 29 Mkpöñ enye okut Jesus asañade etiene enye, önyuñ ödöhö ete, Sese, Eyeneröñ Abasi, emi emende midiöñkpö
- 30 ererimbot efep ! Emi edi Enye eke ami ndöhöde mbaña Enye, nte, Owo ke etiene mi ke edem emi akabarede edi
- 31 ebe-iso mi : koro Enye ekebemde mi iso odu. Ami ñkönyuñ ndiöñöke Enye ; edi ke abaña emi ke ami ndi, 'nonīm baptism ke möñ, man èkpeyarare Enye önö Israel.
- 32 Ndien John etiñ ikö ntiense ete, Ñkokut Spirit oto ke
- 33 enyöñ ösukhöre nte ibiom odorö Enye ke idem. Ndien ami ñködiöñöke Enye : edi Enye emi ödöñde mi ete 'nīm baptism ke möñ, Enye ödöhö mi, ete, Owo emi afo edikutde Spirit ösukhörede, odorö Enye ke idem, edi Enye edinīm
- 34 baptism ke Edisana Spirit. Ndien ami ma ñkut, nyuñ ntñ ikö ntiense nte, Emi edi Eyen Abasi.
- 35 Mkpöñ John ötöñö ntak ada ñko, ye owo mbet esie iba ;

JOHN 2.

36 önyuñ ese Jesus nte Enye asañade, ndien ödöhö ete, Sese,
 37 Eyeneröñ Abasi ! Ndien mbet esie iba oro êkop nte enye
 38 ödöhöde, önyuñ etiene Enye. Ndien Jesus akabare, ese
 mö nte etienede Enye, önyuñ ödöhö mö, ete, Mbufo ëyom
 so ? Ndien mö ëbörö Enye, ete, Rabbi (emi ke erisiak
 39 ikö öwöröde, Andikpep), Afo adañ ke möñ ? Enye ete
 mö, Êdi, ndien mbufo ëyekut. Ntem mö etiene êkekut
 ebiët eke Enye adañde ; ndien mö êtie ye Enye ke usen
 40 oro : ekedi ñkpö nte öyöhö ñkanika duop. Owo kiet
 kotu owo iba oro êkekopde ikö John, önyuñ etienede
 41 Enye, edi Andrew, eyen-eka Simon Peter. Enye ebem
 iso oyom eyen-eka esie Simon, önyuñ ödöhö enye, ete,
 Nyin ima ikut Messiah (emi ke erisiak ikö edide Christ).
 42 Enye ada enye ösök Jesus. Jesus ese enye, önyuñ ödöhö
 ete, Afo edi Simon eyen John : afo eyekere Cephas (emi
 ke erisiak ikö edide Peter).
 43 Mkpöñ Enye oyom ndisaña ñka ke Galilee, ndien Enye
 44 okut Philip ; önyuñ ödöhö enye, ete, Tiene Mi. Ndien
 45 Philip edi owo Bethsaida, obio Andrew ye Peter. Philip
 okut Nathanael, önyuñ ödöhö enye, ete, Nyin ima ikut
 Enye emi Moses ke ibet, ye me-prophet êkewetde ëbaña,
 46 Jesus emi otode ke Nazareth, eyen Joseph. Ndien
 Nathanael ete enye, Nte etl ñkpö ekededi ekeme ndito ke
 47 Nazareth ? Philip ete enye, Di dise. Jesus okut
 Nathanael asañade etiene Enye, önyuñ ödöhö abaña enye,
 ete, Sese, ata eyen Israel, emi abiaña miduhe enye kesit !
 48 Nathanael ete Enye, Ada nso ödiönö mi ? Jesus öbörö
 enye, ete, Ke Philip mika-ikotke fi kaña, kini afo okodude
 49 ke idak eto fig, Ami ma ñkut fi. Nathanael öbörö Enye,
 ete, Rabbi, Afo edi Eyen Abasi ; Afo edi Edidem Israel.
 50 Jesus öbörö enye, ete, Nte afo omonim ke akpanikö, koro
 Ami ndöhöde fi, nte, Ma ñkut fi kidak eto fig ? Afo eyekut
 51 ñkpö eke êkponde êkan memö emi. Ndien Enye
 ödöhö enye, ete, Kakpan ke ndöhö mbufo, nte, Mbufo
 ëyekut enyöñ ökubörede, ye me-angel Abasi ëdökde
 önyuñ ësukhörede ëdoro Eyen owo.

2 EKEM ke öyöhö usen ita ndö odu ke Cana ke Galilee ;
 2 ndien eka Jesus odu do : önyuñ êkot Jesus, ye mbet Esie,
 3 ëdi ndö ñko. Ndien ke wine okurede, eka Jesus ete Enye,
 4 Mö inyeneke wine. Ndien Jesus ete enye, Nwan, Ami
 5 nsaña nso ye afo ? ini Mi ika-idige kaña. Eka Esie

JOHN 2.

- ödöhö mesañutom, ete, Se Enye edidöhöde mbufo, ênam.
- 6 Ndien abañ möñ itiat itiokiet ëdiökhö do nte ido erinam asana Me-Jew asañade : abañ kiet kiet esïne
- 7 adaña nte gallon edip. Jesus ödöhö mö, ete, Êsìn möñ ke me-abañ ëyöhö. Ndien mö ëyöhö mö tutu osīm inua.
- 8 Ndien Enye ödöhö mö, ete, Êkoi kemi, ëmen ësök ëtubom
- 9 usörö. Ndien mö ëmen ësök *enye*. Ndien kini ëtubom usörö atabide möñ oro ama akabare edi wine kemi, edi ifiökke ebiët eke enye otode (edi mesañutom emi ëkekoide
- 10 möñ ëfiök), ëtubom usörö okot ödö ndö edi, önyuñ ödöhö enye, ete, Kpukpru owo ëbem iso ënīm eti wine ; ndien kini owo ëñwöñde ediwak, ënīm sè mifönke nte enye eken :
- 11 afo ama omum eti wine akama tutu osīm emi. Jesus anam akpa idiöñö Esie emi ke Cana ke Galilee, önyuñ ayarare uböñ Esie ; mbet Esie ënyuñ ënīm Enye ke akpanikö.
- 12 Ke ñkpo emi ëma ëkebe, Enye, ye eka Esie, ye nditö-eka Esie, ye mbet Esie ësukhöre ëka ke Capernaum : ndien mö itiehe do ediwak usen.
- 13 Ekem passover Me-Jew ekpere, ndien Jesus ödök aka
- 14 Jerusalem. Ndien Enye okut ke temple mö emi ënyamde enañ ye eröñ ye ibiom, ye mekpuhö-okuk ëtiede do :
- 15 ndien Enye ada ñkpri uruk anam ikpa, ebīn kpukpru mö, ye eröñ ye enañ, ëwöñö ke temple ; önyuñ añwaña okuk mekpuhö-okuk öduök, önyuñ öduök mokpokoro mö ke
- 16 isöñ ; önyuñ ödöhö mö emi ënyamde ibiom, ete, Êmen ñkpo emi ëdakha ; ëkunam ufök Ête Mi edi ufök urua.
- 17 Mbet Esie ëti nte ëkewetde ëte, Udöñ ufök Fo
- 18 eyeta Mi. Ntem Me-Jew ëdöhö Enye, ëte, Nso idiöñö ke Afo owut nyīn, emi Afo anamde me-ñkpo
- 19 emi ? Jesus öbörö mö, ete, Êwuri temple emi,
- 20 ndien Ami nyeböp enye ke usen ita. Ntem Me-Jew ëdöhö ëte, Êkeda isua aba ye itiokiet ëböp temple emi,
- 21 ndien nte Afo ediböp enye ke usen ita ? Edi Enye
- 22 ödöhö abaña temple ikpöhidem Esie. Mödo ke Enye ama ekeset ke mkpa, mbet Esie ëti nte Enye öködöhöde ikö emi ; ndien mö ënīm ñwed Abasi ye ikö eke Jesus öködöhöde ke akpanikö.
- 23 Ekem ke ini Enye odude ke Jerusalem ke passover, ke ini usörö, ediwak owo ënīm enyiñ Esie ke akpanikö,
- 24 ëkutde midiöñö oro Enye anamde. Edi Jesus ibuötke
- 25 Idemesie ye mö, oto koro Enye öfiökde kpukpru owo, sia

JOHN 3.

Enye minyuñ iyomke ite owo asian Imö abaña owo ; koro Enye ke Idemesie öfiökde se idude kesit owo.

- 3** Owo Pharisee odu, ekere Nicodemus, andikara Me-Jew :
2 enye etiene Jesus ke okoneyo, önyuñ ödöhö Enye, ete, Rabbi, nyin imöfiök ite Afo edi ekpep-owo emi otode Abasi : koro baba owo kiet emi ekemedede ndinam midiöñö oro Afo anamde miduhe, iböhöke Abasi odu ye enye.
3 Jesus ödöhö enye, ete, Kakpan ke ndöhö fi, nte, Ke owo mimanake öbufa, enye ikemeke ndikut obio
4 Abasi. Nicodemus ete Enye, Didie ke owo edimana kini enye ösöñde ? nte enye emekeme nditöñö ntak 'nduk ke
5 idibi eka esie, 'nyuñ 'mana ? Jesus öbörö ete, Kakpan ke ndöhö fi, nte, ke owo mimanake ito ke möñ ye Spirit, enye
6 ikemeke ndiduk ke obio Abasi. Se amanade oto ke öbukidem edi öbukidem ; se amanade oto ke Spirit edi
7 spirit. Kuyik koro Ami ndöhöde fi, nte, Mbufo ënyene
8 ndimana öbufa. Ofim ofime ebiët enye amama, afo ömönyuñ okop uyo esie, edi ufiökke ebiët eke enye otode ye ebiët eke enye akade : edi ntre ye kpukpru owo kiet kiet
9 emi amanade oto ke Spirit. Nicodemus obup Enye, ete,
10 Didie ke ñkpö emi ëkeme ndidu ? Jesus öbörö enye, ete, Nte afo edi ekpep-owo ke Israel, ndien ufiökke
11 ñkpö emi ? Kakpan ke ndöhö fi, nte, Nyin itin se nyin ifiökde, inyuñ idöhö ikö ntiense ibaña se nyin *ima ikokut* ;
12 ndien mbufo inyimeke ikö ntiense nyin. Ami ma ndöhö mbufo me-ñkpö isöñ, ndien mbufo inimke ke akpanikö, didie ke mbufo edinim ke akpanikö, ke Ami ndöhöde mbufo
13 me-ñkpö enyöñ ? Ndien ndomo owo kiet idökke kenyöñ iduk ke heaven, iböhöke Enye emi otode ke heaven
14 ösukhöre, kpa Eyen owo, emi odude ke heaven. Ndien kpa nte Moses ekemende urukiköt kenyöñ ke desert,
15 kpa ntre ke ënyene ndimen Eyen owo kenyöñ : man owo ekededi eke öbuötde idem ke Enye ekpenyene nsinsi uwem.
16 Koro Abasi amama ererimbot adaña nte Enye ökönöde Edibon Eyen Esie kierakiet, man owo ekededi eke öbuötde
17 idem ye Enye okutak, edi enyene nsinsi uwem. Koro Abasi miködöñke Eyen Esie ke ererimbot ndikpe ikpe ye
18 ererimbot, edi man ënyaña ererimbot oto ke Enye. Ikpehe ikpe ye owo emi öbuötde idem ye Enye : enye emi mibuötke idem ye Enye, ëma ëkpe ikpe ye enye ëma, koro enye mibuötke idem ke enyñ Edibon Eyen Abasi kiera-

JOHN 4.

19 kiet. Ndien emi edi ikpe oro, ete, uñwana emedi ke
 ererĩmbot, ndien owo ěmama ekĩm ěkan uñwana ; koro
 20 utom mō ědiőkde. Koro kpukpru owo kiet kiet emi
 anamde idiőńkpō asua uñwana, inyuñ iwöröke ke
 21 uñwana, mbak ědisua ěnō se enye anamde. Edi enye emi
 anamde akpanikō öwörö ke uñwana, man utom esie
 ayarare, ete, anam ke Abasi.

22 Ke me-ńkpō emi ěma ěbe Jesus ye mbet Esie ědi ke
 isőń Judæa ; ndien Enye etie do ye mō onĩm baptism.
 23 John önyuñ onĩm baptism ke Ąnon emi ekperede Salim,
 koro mōñ awakde do : ndien mō ědi ědina baptism.
 24 Koro mika-isĩnke John kaña ke ufök-ńkpököbi. Ndien
 25 ndusuk mbet John ěneni ye Jew kiet ěbaña erinam asana.
 26 Ndien mō ětiene John, ěnyuñ ědöhö enye, ěte, Rabbi, Sese,
 Enye emi okodude ye afo ke edem Jordan oko, emi afo
 eketĩnde ikō ntiense abaña Enye, ke onĩm baptism,
 27 kpukpru owo ěnyuñ ětiene Enye. John ödöhö ete,
 Owo ikemeke ndibö baba ńkpō kiet, iböhöke ěnōde
 28 enye oto ke heaven. Mbufo idemmbufo ědi mentiense
 ěte, ami ndöhö nte, Ami ndige Christ, edi, ědōñ mi
 29 ěte mbem Enye iso. Enye emi enyenede ñwan-ndö edi
 ödö-ñwan : edi ufan ödö-ñwan, emi adade okop uyo esie,
 adara akpan akpan kabaña uyo ödö-ñwan : ntem idara
 30 mi emi öyöhö. Enye enyene ndiköri, edi ami nyene
 ndikabare ńkpri.

31 Enye emu otode ke enyőñ okpon akan kpukpru : enye
 emi otode ke isőñ edi eke isőñ, önyuñ ödöhö ńkpō isőñ :
 32 enye emi otode ke heaven okpon akan kpukpru. Se
 Enye okutde önyuñ okopde, ke Enye ödöhö nte ntiense ;
 33 ndien baba owo kiet inyĩmeke ikō ntiense Esie. Enye
 emi onyĩmede ikō ntiense Esie ama onĩm idiőñö, ete, Abasi
 34 edi akpanikō. Koro Enye emi Abasi ödōñde etiñde ikō
 35 Abasi : koro Enye minőñö Spirit ke idomo. ěte amama
 Eyen, ama önyuñ ayak kpukpru ńkpō esĩn ke ubök Esie.
 36 Owo emi öbuötde idem ye Eyen enyene nsinsi uwem ;
 edi enye emi mibuötke idem ye Eyen idique uwem, edi
 iyaresĩt Abasi odorö enye.

4 NTEM kini Öböñ öfiőkde ete, Me-Pharisee ěma ěkop
 2 ěte, Jesus ke anam önyuñ onĩm mbet baptism akan John
 (okposuk edi nte Jesus ke Idemesie minĩmke baptism, edi
 3 mbet Esie ěnim), Enye adakha ke Judæa, ötöñö ntak ö yōñ

JOHN 4.

4 ke Galilee. Ndien Enye enyene ndisaña mbe ke Samaria.
 5 Ntre Enye osim obio Samaria kiet, emi ekerede Sychar,
 ekpere ubak ison oro Jacob okonode Joseph eyen esie :
 6 ndien obube mon Jacob odu do. Ndien koro Jesus akpade
 mba ke isan Esie, Enye etie ntem ke mben obube mon.
 7 Edi adana nte oyohon nkanika itiokiet. Nwan Samaria kiet
 edi ndikot mon : Jesus odohon enye, ete, No mi mon nwon.
 8 Koro mbet Esie ema eka ke obio ndidep udia. Ndien
 9 nwan Samaria oro odohon Enye, ete, Didie ke afo, emi
 edide Jew, ebehe mi, nwan Samaria, mon eke onwonde ?
 10 (Koro Me-Jew misanake nkpoye mbio Samaria.) Jesus
 oboro enye, ete, Afo ama okpofok eno Abasi, ama
 okponyun odionon Enye emi odohode fi, ete, No Mi mon
 nwon ; afo ekpebehe Enye, ndien Enye okpono fi odu-
 11 uwem mon. Nwan oro odohon Enye, ete, Obon, Afo
 unyeneke nkpoye ndikot, obube onyun otunon : oto mon
 12 ndien ke Afo enyene udu-uwem mon oro ? Nte Afo
 omokpon akan Ete nyin Jacob, emi okonode nyin obube,
 okonyun onwonde ke idemesie, ye ndito esie, ye ufene
 13 esie ? Jesus oboro enye, ete, Kpukpru owo kiet kiet
 eke onwonde mon emi, iton eyetonon ntak asat enye :
 14 edi owo ekededi eke onwonde mon oro Ami ndinode
 enye, iton idisatke enye aba ; edi mon oro Ami ndinode
 eyekabare edi idim mon kesit esie onon nsinsi uwem.
 15 Nwan oro ete Enye, Obon, no mi mon emi, man iton
 okusat mi, ami nkunyun ndi mi aba ofuri usun emi ndikot
 16 mon. Jesus ete enye, Ka kokot uberi, nyun di ken.
 17 Nwan oro oboro Enye, ete, 'Nyeneke ebe. Jesus
 ete enye, Afo omotim odohon ete, uyeneke ebe : koro
 18 afo ama okodo mebe ition ; ndien owo emi afo odude
 ye enye kemi idige uberi : afo omodohon akpaniko.
 19 Nwan oro ete Enye, Obon, mokut nte Afo edi prophet.
 20 Mete nyin eketuak ibuo eno Abasi ke obot emi ; edi
 mbufo ete, Ke Jerusalem ebiot odu emi owo enyenede
 21 ndituak ibuo. Jesus ete enye, Nwan, nim uyo mi ke
 akpaniko, ini ke edi, eke midige ke obot emi, minyun idige
 22 ke Jerusalem, ke mbufo edituak ibuo eno Ete. Mbufo
 etuak ibuo eno se mbufo mifokke : nyin ituak ibuo ino
 23 se nyin ifokde : koro erinyaña otode ke Me-Jew. Edi
 ini ke edi, onyun odu kemi, eke ata mendituak ibuo
 edituakde ibuo eno Ete ke spirit ye ke akpaniko : koro
 Ete oyomde oruk owo emi edi mendituak ibuo eno

JOHN 4.

- 24 Enye. Abasi edi Spirit : ndien mö emi ètuakde ibuo^t ènò
Enye ènyene ndituak ibuo^t ke spirit ye ke akpanikö.
- 25 Ñwan oro ete Enye, Möfiök nte Messiah ke edi (emi ekerede
Christ) : Enye ama edi, eyesian nyin kpukpru ñkpö.
- 26 Jesus ete enye, Ami emi ndöhöde ye afo ndi *Enye*.
- 27 Ndien ke ini emi mbet Esie èdi ; ndien mö èyik koro
Enye enemede neme ye ñwan ; edi ndomo owo kiet
idöhöke ite, Afo oyom nso ? me, Nsinam Afo enemede neme
28 ye enye ? Ntre ñwan oro ökpöñ abañ esie, aka ke obio,
29 önyuñ ödöhö mbiobio, ete, Èdi, èdise owo emi ödöhöde
mi kpukpru ñkpö eke ñkanamde : Nte Enye emi
30 ekeme ndidi Christ ? Mö èwöñö ke obio, èsaña èbìne
31 Enye. Kemi mbet Esie èkpe ye Enye, ète, Rabbi, dia
32 ñkpö. Edí Enye ödöhö mö, ete, Ami menyene udia eke
33 ndiade eke mbufo mifiökke. Ndien mbet èdöhö kiet ye
eken, ète, Me owo ekededi ama önö Enye udia adia ?
34 Jesus ete mö, Udia Mi edi ndinam se Ète emi öködöñde Mi
35 amade, 'nyuñ 'nam utom Esie 'ma. Nte mbufo idöhöke
ite, Ösuk kaña öfiöñ inañ, ndien ini ukpeñe edi ? Sese,
Ami ndöhö mbufo, nte, Èmenere enyìn mbufo, èse iñwañ,
36 nte mö èdatde èkem ini ukpeñe. Enye emi ekpeñede öbö
ñkpö eyen-utom, önyuñ atañ mfri önö nsinsi uwem ; man
enye emi awaride mkpasip ye enye emi ekpeñede èdara
37 ötö kiet. Koro ke ñkpö emi ikö oro edi akpanikö, ete,
38 Owo kiet awari mkpasip, efen ekpeñe. Ami ñködöñ
mbufo ndikpeñe se mbufo mikanamke utom kesit :
owo eñwen ènam utom, ndien mbufo èduk ke utom
mö.
- 39 Ndien ediwak mbon Samaria ke obio oro ènim Enye ke
akpanikö, oto ke ikö ñwan oro ödöhöde ete, Enye öködöhö
40 mi kpukpru ñkpö eke ñkanamde. Ntre kini mbon
Samaria èsimde Enye, mö èkpe Enye ubök ète, Etie ye
41 mimö : ndien Enye etie do ke usen iba. Ndien ediwak
42 owo efen ènim ke akpanikö oto ke ikö Esie ; mö ènyuñ
èdöhö ñwan oro, ète, Kemi nyin imonim ke akpanikö,
itoho koro afo etĩnde : koro nyin imokop ke idemnyin,
imönyuñ ifiök ite, Enye emi edi Andinyaña ererĩmbot ke
akpanikö.
- 43 Ndien ke musen iba oro èbede Enye adakha do aka ke
44 Galilee. Koro Jesus ke Idemesie etĩnde ikö ntiense ete,
45 prophet inyeneke ukpono ke obio esiemö. Kadañemi
Enye edide ke Galilee, mbon Galilee ènyime Enye, ke èma

JOHN 5.

ēkekut kpukpru ñkpö oro Enye akanamde ke Jerusalem ke usörö : koro mö ēnyuñ ēkade usörö.

- 46 Ntem Enye ötöñö ntak edi ke Cana ke Galilee, ebiēt eke Enye akanamde möñ akabare edi wine. Ndien Öböñ kiet odu do, emi eyen eren esie ödöñöde ke Capernaum.
- 47 Kini enye okopde ete Jesus ama okoto ke Judæa oduk ke Galilee, enye etiene Enye önyuñ ebeñe Enye, ete, Enye ðkpösukhöre edi edinam udöñö okure eyen imö ; koro
- 48 enye oyomde ndikpa. Ndien Jesus ödöhö enye, ete, Iböhöke ini mbufo ēkut midiöñö ye mutibe ñkpö, mbufo
- 49 idinimke ke akpanikö. Öböñ oro ete Enye, Öböñ,
- 50 sukhöre di, ke eyen mi mika-ikpaha kaña. Jesus ete enye, Ka okuo ; eyen fo ke odu uwem. Owo oro onim ikö oro Jesus ödöhöde enye ke akpanikö, ndien önyöñ ke usuñ
- 51 esie. Ekem nte enye ösukhörede önyöñ, iköt esie
- 52 ësobo ye enye, ēte, eyen esie odu uwem. Ndien enye obup mö ñkanika eke enye ötöñöde ndikop idem. Ndien mö ödöhö enye, ēte, Mkpöñ ke öyöhö ñkanika itiaba ufiop-
- 53 idem ökökpöñ enye. Ntre ēte öfiök ete, ekedi ke ñkanika oro Jesus öködöhöde imö, ete, Eyen fo ke odu uwem : ndien enye ke idemesie ye öfuri ufök esie ënim ke akpanikö.
- 54 Ndien emi edi udiana-akpa idiöñö eke Jesus anamde ke Enye ama okoto ke Judæa edi ke Galilee.

- 5 Ke me-ñkpö emi ēbede usörö Me-Jew odu ; ndien Jesus
- 2 ödök aka ke Jerusalem. Mkpödiökhömöñ odu ke Jerusalem ke inua-otop eröñ, emi ke usem Hebrew ēkotde
- 3 Bethesda, ndien enye enyene nsuk uyo ition. Ata ediwak mbon udöñö, ye me-'nan, ye mbuñö, ye mö emi idem
- 5 akpade, ëna do. Ndien owo kiet odu do, emi ödöñöde ke
- 6 isua edip ye efureta. Ke ini Jesus okutde enye nte anade, önyuñ öfiökde ete, enye ama etie *ntre* anyan ini, Enye ödöhö enye, ete, Nte afo akpama ndikop nsöñidem ?
- 7 Owo udöñö oro ete Enye, Öböñ, ami 'nyeneke owo eke esinde mi ke mkpödiökhömöñ kini ëtimerede möñ : edi kini ami ndide, owo eñwen ebem mi iso ösukhöre.
- 8 Jesus ödöhö enye, ete, Dakha kenyöñ men mbri fo, saña.
- 9 Ndien ndo ndo oro idem ösöñ owo oro, enye önyuñ emen mbri esie asaña.
- 10 Usen oro edi sabbath. Ntre Me-Jew ödöhö enye emi udöñö okurede enye, ēte, Edi sabbath, inyuñ inenke
- 11 fi ndimen mbri fo. Edi enye öböörö mö, ete, Enye emi

JOHN 5.

akanamde udöñö okure mi, kpa Enye öködöhö mi, ete,
 12 Men mbri fo, saña. Mö ëbup enye, ëte, Anie owo
 13 öködöhö fi, ete, Men *mbri fo*, saña? Edi owo emi udöñö
 okurede enye ifiökke owo eke edide: koro Jesus ama aka-
 14 dakha, sia otu owo odude ke ebiët oro. Ekem Jesus
 okut enye ke temple, önyuñ ödöhö enye, ete, Sese,
 udöñö fo okure: Kunam aba idiöñkpö, mbak se idiökde
 15 ikan ediwörö önö fi. Owo oro aka öködöhö Me-Jew, ete,
 16 ke edi Jesus akanam udöñö okure imö. Ndien oto do
 Me-Jew ëköbö Jesus, koro Enye akanamde ñkpö emi ke
 17 sabbath. Edi Jesus öbörö mö, ete, Ète mi ke ananam
 18 utom tutu osim emi, Ami 'nyuñ 'nam. Oto do Me-Jew
 ëdediön ëyom Enye ndiwot, idige koro Enye abiatde
 sabbath ikpöñ ikpöñ, edi koro Enye okotde Abasi, ete,
 Ète Imö, anam Idemesie edi ukem ye Abasi.

19 Ndien Jesus ödöhö mö, ete,

Kakpan ke ndöhö mbufo, nte, Eyen ikemeke ndinam
 ñkpö ke Idemesie, iböhöke se Enye okutde nte Ète anamde:
 koro ñkpö ekededi Enye [Ète] anamde, me-ñkpö emi ke
 20 Eyen önyuñ anam kpa suk ntre. Koro Ète amama Eyen,
 önyuñ owut Enye kpukpru ñkpö oro Enye ke Idemesie
 anamde: eyenyuñ owut Enye me-utom emi ëkponde
 21 ëkan me-ñkpö emi, man idem akpa mbufo. Koro nte
 Ète anamde mekpa-mkpa ëset önyuñ önöde mö uwem, kpa
 22 ntre ke Eyen önö owo emi Enye amade uwem. Koro
 Ète minyuñ ikpehe ikpe baba owo kiet, edi Enye ama ayak
 23 kpukpru ikpe önö Eyen, man kpukpru owo ëkpono Eyen,
 kpa nte mö ëkponode Ète. Enye emi mikponoke Eyen
 24 ikponoke Ète emi öködöñde Enye. Kakpan ke ndöhö
 mbufo, nte, Enye emi okopde uyo Mi, önyuñ öbuötde idem
 ye Enye emi öködöñde Mi, enyene nsinsi uwem, inyuñ
 idukke ke ikpe, edi ama öwörö ke mkpa önyuñ oduk ke
 25 uwem. Kakpan ke ndöhö mbufo, nte, Ini ke edi, önyuñ
 odu kemi, eke mekpaña-mkpa ëdikopde uyo Eyen Abasi;
 26 ndien mö emi ëkopde ëyedu uwem. Koro nte emi Ète
 enyenede uwem ke Idemesie, kpa suk ntre ke Enye ökönö
 27 Eyen ñko ndinyene uwem ke Idemesie: Enye ökönyuñ
 önö Enye odudu ndikpe ikpe, koro Enye edide Eyen owo.
 28 Èkuyik ñkpö emi: koro ini ke edi, eke kpukpru mö emi
 29 ëdude ke me-udi ëdikopde uyo Esie, ëyenyuñ ëwöñö;
 mö emi ëkenamde se ifönde ke eriset uwem; ye mö emi
 ëkenamde se idiökde ke eriset ubiom-ikpe.

JOHN 6.

30 Ami ke Idemmi ñkemeke ndinam ñkpö : nte ñkopde,
 ke Ami ñkpe ikpe : ikpe Mi önyuñ enen ; koro Ami
 menyomke se Ami 'made ke Idemmi, edi se Enye emi
 31 öködöñde Mi amade. Ami 'ma ndöhö ikö ntiense mbaña
 32 Idemmi, ikö ntiense Mi idige akpanikö. Edi efen odu eke
 etiñde ikö ntiense abaña Mi ; Ami mönyuñ mfiök nte ikö
 33 ntiense oro enye ödöhöde abaña Mi edi akpanikö. Mbufo
 ëma ëdöñ owo ëtiene John, enye önyuñ ödöhö ikö
 34 ntiense abaña akpanikö. Edi ikö ntiense eke Ami 'nyenede
 itoho owo : edi Ami mödöhö me-ñkpö emi, man ënyaña
 35 mbufo. Enye ekedi utuenikañ eke asakde önyuñ ayama-
 de ; ndien mbufo ëkenyime ndidara ke uñwana esie
 36 ke ini. Edi ikö ntiense emi Ami 'nyenede okpon akan
 eke John : koro me-utom emi Ète ökönöde Mi ete 'nam
 ma, idem me-utom oro Ami 'namde ödöhö ikö ntiense
 37 ëbaña Mi, ëte, Ète öködöñ Mi. Ndien Ète emi öködöñde
 Mi, Enye ama ödöhö ikö ntiense abaña Mi. Akananam
 38 mbufo ikopke uyo Esie, inyuñ ique mbiët Esie. Ikö Esie
 inyuñ iduhe kesit mbufo : koro mbufo minimke Enye eke
 39 Enye ödöñde ke akpanikö. Mbufo ëduñöre me-ñwed
 Abasi, koro mbufo ëkerede ëte, mbufo ëmenyene nsinsi
 uwem kesit mö ; ndien mö emi ëdi mö emi ödöhöde ëbaña
 40 Mi ; edi mbufo inyimeke nditiene Mi, man mbufo ënyene
 41 uwem. Ami mböhö owo ukpono. Edi Ami möfiök
 42 mbufo, nte, mbufo inyeneke ima Abasi kesit mbufo. Ami
 43 medi ke enyiñ Ète Mi, ndien mbufo inyimeke Mi : owo
 eñwen ama edi ke enyiñ esiemö, enye ke mbufo ëdinyime.
 44 Didie ke mbufo ëkeme ndinim ke akpanikö, emi ëböde kiet
 eken ukpono, ndien iyomke ukpono emi otode ke Abasi
 45 kierakiet ? Èkukere ëte Ami nyedori mbufo ikö kiso Ète :
 kiet odu emi odoride mbufo ikö, kpa Moses emi mbufo
 46 ëdoride enyiñ ke enye. Koro edieke mbufo ëkpenimde
 Moses ke akpanikö, mbufo ëkpenim Mi ke akpanikö ;
 47 koro enye ekewetde abaña Mi. Edi edieke mbufo minimke
 me-ñwed esie ke akpanikö, didie ke mbufo ëdinim ikö Mi
 ke akpanikö ?

6 Ke ñkpö emi ëbede Jesus adakha aka ke edem inyañ
 2 Galilee oko, emi edide inyañ Tiberias. Ndien ata ediwak
 owo ëtiene Enye, koro mö ëkutde midiöñö emi Enye
 3 anamde ke idem mö emi ëdöñöde. Ndien Jesus ödök
 4 akamba obot, önyuñ etie do ye mbet Esie. Ndien passover,

JOHN 6.

- 5 usörö Me-Jew, ekpere. Ndien Jesus emenere enyìn Esie, önyuñ okut nte ata ediwak owo ètienede Enye, ndien ödöhö Philip, ete, Ke möñ ke nyìn ididep uyo, man memö
- 6 emi èdia ? Enye ödöhö ikö emi ndidomo enye : koro
- 7 Enye ke Idemesie öfiökde se Enye edinamde. Philip öbörö Enye, ete, Uyo ke okuk ikie iba ikemke, man kpukpru owo
- 8 kiet kiet adia nsit nsit. Owo mbet Esie kiet, Andrew, eyen-
- 9 eka Simon Peter, öbörö Enye, ete, Akparawa kiet odu mi, emi enyenede uyo ition ye iyak iba : edi mö emi èdi
- 10 nso kotu ediwak owo ntre ? Jesus ödöhö ete, Ènam me-owo ètetie. Ndien mbièt awak ke ötö oro. Ntre me-owo
- 11 oro ètetie, ibat mö edi adaña nte thousand ition. Ndien Jesus ada me-uyo oro ; ndien ke ama ökönö eköm, enye edeme önö mö emi ètiede ; önyuñ anam kpa ntre ye iyak
- 12 ñko adaña nte mö èmade. Ndien kini mö èyukhöde, Enye ödöhö mbet Esie, ete, Ètañ ñkeñe eke ösukhöde,
- 13 kpañ baba ñkpö kiet okutak. Ntre mö ètañ mö, ènyuñ èyöhö akpasa duopeba ye ñkeñe uyo ition, eke ösukhöde
- 14 ke mö èdiade èma. Ntem ke mbon oro èkutde idiöñö oro Enye anamde, mö èdöhö ète, Ke akpanikö Enye emi edi prophet eke edide ke ererimbot.
- 15 Ndien ke Jesus öfiökde ete, mö èyom ndidi ndida Enye ke odudu 'nīm Enye nte edidem, Enye ötöñö ntak adakha aka ke akamba obot ke Idemesie ikpöñ.
- 16 Ke mbubreyo mbet Esie èsukhöre èka aqua inyañ ; ndien
- 17 mö èdiere ke ubom, èwat èbe inyañ ète ika ke Capernaum. Ndien kemi ekīm odu, ndien Jesus ika-isīmke mö kaña.
- 18 Ndien inyañ adakha oto ke ökpösöñ ofīm eke ofimede.
- 19 Ndien ke mö èma èkewat mile ita me inañ, mö èkut Jesus asañade ke inyañ, ekpere ubom ; ndien mö èfeghe ndik.
- 20 Edi Enye ödöhö mö, ete, Edi Ami ; èkufeghe ndik. Ndien
- 21 mö ènyime Enye ediere ke ubom : ndien idaha oro ubom ebekhe ke ebièt eke mö èkade.
- 22 Mkpöñ otu owo oro èdade ke edem inyañ oko èkut ète, ubom efen iduhe do, iböhöke kiet, nte Jesus minyuñ idiereke ke ubom oro ye mbet Esie, edi mbet Esie èkewat
- 23 ikpöñ (edi me-ubom èto ke Tiberias èdi èdikpere ebièt oro
- 24 èketade uyo ke Öböñ ama ökönö eköm ama) : ntem kini otu owo èkutde ète Jesus iduhe do, mbet Esie inyuñ iduhe, mö ke idemmö èdiere ke ubom, èdi ke Capernaum, ke èyom
- 25 Jesus. Ndien kini mö èkutde Enye ke edem inyañ eken, mö èdöhö Enye, ète, Rabbi, ke ini ewe ke Afo ekedi mi ?

JOHN 6.

26 Jesus öbörö mö, ete, Kakpan ke ndöhö mbufo, nte,
 Mbufo eyom Mi, idige koro mbufo eke kutde midionö,
 27 edi koro mbufo eketade uyo enyün eyukhöde. Ekunam
 utom ebaña uyo eke esobode, edi ebaña uyo oro ebigide
 osim nsinsi uwem, emi Eyen owo edinöde mbufo : koro
 28 Ète kpa Abasi ama onim Enye idionö. Mö ödöhö Enye
 29 ndien, ète, Nyin idinam nso, man inam utom Abasi ?
 Jesus öbörö mö, ete, Emi edi utom Abasi, ete, mbufo
 30 enim Enye emi Enye öködönde ke akpanikö. Ndien
 mö ödöhö Enye, ète, Nso idionö ke Afo anam ndien, man
 nyin ikut inyün inim Fi ke akpanikö ? nso utom ke Afo
 31 anam ? Mète nyin ekedia manna ke wilderness ; nte
 ewetde ète, Enye ökönö mö uyo oto ke heaven ndidia.
 32 Ndien Jesus ödöhö mö, ete, Kakpan ke ndöhö mbufo, nte,
 Ikedige Moses eke ökönöde mbufo uyo oto ke heaven ;
 33 edi Ète Mi önö mbufo ata uyo oto ke heaven. Koro
 uyo Abasi edide Enye emi otode ke heaven osukhöre,
 34 onyün önöde ererimbot uwem. Mö ödöhö Enye, ète,
 35 Öböñ, nö nyin uyo emi kpukpru ini. Jesus ödöhö mö,
 ete, Ami ndi uyo uwem : biön ididönke enye emi etienede
 Mi, itön idinyün isatke enye ke nsinsi emi onimde Mi ke
 36 akpanikö. Edi Ami ndöhö mbufo, nte, mbufo ëma ekut
 37 Mi, edi inimke ke akpanikö. Kpukpru owo emi Ète önöde
 Mi eyetiene Mi ; ndien owo emi etienede Mi Ami ndiduökke
 38 enye. Koro Ami ntode ke heaven nsukhöre, idige ndinam
 39 se Ami 'made, edi se Enye emi öködönde Mi amade. Ndien
 emi edi se Enye emi öködönde Mi amade, ete, ke kpukpru
 se Enye önöde Mi, Ami mkpöduökke baba kiet, edi nkpanam
 40 enye eset ke ukperedem usen. Koro emi edide se Ète Mi
 amade, ete, kpukpru owo kiet kiet emi okutde Eyen,
 onyün onimde Enye ke akpanikö, ekpenyene nsinsi uwem ;
 ndien Ami nyenam enye eset ke ukperedem usen.
 41 Ndien Me-Jew esuk Enye uyo, koro Enye ödöhöde ete,
 42 Imö idi uyo emi otode ke heaven osukhöre. Ndien mö
 ödöhö ète, Nte emi idige Jesus, eyen Joseph, emi nyin
 idionöde ète ye eka Esie ? Nsinam Enye ödöhöde
 43 kemi ete, Ami nto ke heaven nsukhöre ? Jesus öbörö
 44 mö, ete, Ekusuk uyo kotu idemmbufo. Baba owo
 kiet ikemeke nditiene Mi, iböhöke ini Ète emi
 öködönde Mi odudi enye : ndien Ami nyenam enye
 45 eset ke ukperedem usen. Èwet ke me-prophet ète, Abasi
 eyekpep mö kpukpru. Kpukpru owo emi okopde uyo

JOHN 6.

46 Ète, önyuñ ekpepde, etiene Mi. Idige nte owo ekededi okokutde Ète, iböhöke Enye emi otode ke Abasi; Enye
47 ama okut Ète. Kakpan ke ndöhö mbufo, nte, Enye eke
48 onimde ke akpanikö enyene nsinsi uwem. Ami ndi uyo
49 uwem. Mëte mbufo êkedia manna ke wilderness ënyuñ
50 êkpaña. Emi edi uyo emi otode ke heaven ösukhöre, man
51 owo adia enye, ndien okukpa. Ami ndi odu-uwem uyo eke
otode ke heaven ösukhöre: owo ekededi ama ata uyo
emi, enye eyedu uwem ke nsinsi: Ih, ndien uyo oro Ami
ndinöde edi öbukidem Mi, kabaña uwem ererimbot.

52 Ndien Me-Jew ëneni kiet ye eken, ëte, Didie ke owo emi
53 ekeme ndinö nyin öbukidem Esie ita? Ndien Jesus ödöhö
mö, ete, Kakpan ke ndöhö mbufo, nte, Iböhöke mbufo
ëta öbukidem Eyen owo ënyuñ ëñwön iyip Esie, mbufo
54 inyeneke uwem ke esit mbufo. Enye eke atade öbukidem
Mi önyuñ öñwönde iyip Mi enyene nsinsi uwem; Ami
55 nyenyuñ 'nam enye eset ke ukperedem usen. Koro
öbukidem Mi edide udia ke akpanikö, iyip Mi önyuñ
56 edide ediñwön-ñkpö ke akpanikö. Owo eke atade öbukidem
Mi önyuñ öñwönde iyip Mi odu ke esit Mi, Ami 'nyuñ ndu
57 ke esit esie. Nte Ète emi odude uwem öködönde Mi,
ndien Ami ndu uwem oto ke Ète; ntre owo emi atade Mi,
58 enye ñko eyedu uwem oto ke Ami. Emi edi uyo eke otode
ke heaven ösukhöre: idige nte mëte êketade, ënyuñ
êkpaña: enye emi atade uyo emi eyedu uwem ke nsinsi.
59 Jesus etiñ ikö oro ke synagogue, nte Enye ekpepde ke
Capernaum.

60 Ndien ediwak mbet Esie, kini mö êkopde *emi*, ödöhö ëte,
61 Emi edi ökpösön ikö: anie ekeme ndikop enye? Edi
Jesus, ke öfiökde ke esit Esie nte mbet Esie ësukde uyo
ëbaña emi, ödöhö mö, ete, Nte ikö emi esin mbufo
62 ëduö? Nso ndien edieke mbufo êkpekutde Eyen owo
ödökde aka ke ebiët oro Enye okodude ke mbemiso?
63 Edi spirit önö uwem; öbukidem ifönke baba ñkpö kiet:
me-ikö eke Ami ndöhöde mbufo ëdi spirit, ënyuñ ëdi uwem.
64 Edi ndusuk mbufo ëdu emi minimke ke akpanikö. Koro
Jesus öfiökde toto ke eritönö owo emi minimke ke
65 akpanikö, ye owo emi editapde Enye. Ndien Enye ödöhö
ete, Oto ke ñkpö emi Ami ñködöhö mbufo, nte, baba owo
kiet ikemeke nditiene Mi, ke Ète minönö enye ukeme.

66 Ke ikö emi ediwak mbet Esie ëfiak edem, inyuñ isañake
67 aba ye Enye. Ndien Jesus ödöhö *mbet Esie* duopeba, ete,

JOHN 7.

68 Nte mbufo ñko emeyom ndinyõn ? Simon Peter öbörö
 Enye, ete, Öböñ, nyin iditiene anie ? Afo emenyene ikö
 69 nsinsi uwem. Ndien nyin imonim ke akpanikö imönyuñ
 70 ifiök ite, Afo edi Edisana Eyen Abasi. Jesus öbörö mö,
 ete, Nte Ami ñkemekke mbufo owo duopeba, ndien owo
 71 mbufo kiet edi demon ? Enye ödöhö abaña Judas *eyen*
 Simon Iscariot, koro enye edide owo duopeba oro kiet emi
 editapde Enye.

7 Kε ñkpö oro ebede Jesus asaña ke Galilee : koro
 Enye minyimeke ndisaña ke Judæa, koro Me-Jew eyomde
 2 ndiwot Enye. Ekem usörö Me-Jew ekpere, kpa usörö
 3 ataya. Ndien nditö-eka Esie ödöhö Enye, ète, Dakha ke
 ötö emi, ka ke Judæa, man mbet Fo ñko ekut utom Fo eke
 4 Afo anamde. Koro baba owo kiet minamke ñkpö ke
 ndibe, kini enye oyomde owo ediöñö enye ke añwa. Afo
 ama anam me-ñkpö emi, yarare Idemfo nö ererimbot.
 5 Koro kpa nditö-eka Esie minimke Enye ke akpanikö.
 6 Ndien Jesus ödöhö mö, ete, Ini mi ikemke kaña ; edi ini
 7 mbufo ekem kpukpru ini. Ererimbot ikemeke ndisua
 mbufo ; edi enye asasua Mi, koro Ami ntinde nte ntiense
 8 mbaña enye, nte, me-utom esie ediök. Mbufo ödök ëka
 usörö : Ami ndökke kaña ñka usörö emi ; koro ini Mi
 9 mika-iyöhöke kaña. Ndien ke Enye ama öködöhö mö
 ikö emi, Enye osuk etie ke Galilee.

10 Edi kini nditö-eka Esie ödökde ëka ke usörö, Enye
 önyuñ ödök aka ñko, idige añwa añwa, edi nte edide ke
 11 ndibe. Ndien Me-Jew eyom Enye ke usörö, ënyuñ
 12 ödöhö ète, Enye odu möñ ? Ndien nsuk-uyo edu eti
 eti kotu me-otu owo ëbaña Enye : ndusuk owo ète,
 Enye edi eti owo ; mö efen ète, Idige ntre, edi Enye
 13 ababiaña otu owo. Edi baba owo kiet ibañake Enye
 añwa añwa mbak Me-Jew.

14 Ekem ke uföt usörö Jesus ödök ke temple, önyuñ ekpep.
 15 Ndien Me-Jew eyik ète, Didie ke owo emi öfiök ñwed, emi
 16 akananam mikpepke ? Jesus öbörö mö, ete, Erikpep Mi
 17 idige okim, edi eke Enye emi öködöñde Mi. Edieke owo
 onyimedede ndinam se Enye amade, enye eyefiök abaña
 erikpep oro, me oto ke Abasi, me Ami ntin ikö Idemmi.
 18 Enye emi etinde ikö oto ke idemesie oyom ukpono esiemö :
 edi enye emi oyomde ukpono enye emi öködöñde enye,
 kpa enye edi akpanikö, baba uquañido inyuñ iduhe ye

JOHN 7.

- 19 enye. Nte Moses ikönöñö mbufo ibet, ndien baba owo
kiet kotu mbufo inīmke ibet? Nsinam mbufo eyomde
20 ndiwot Mi? Otu owo edöhö ète, Afo emenyene demon :
21 anie oyom ndiwot Fi? Jesus öbörö mö, ete, Ami ñkanam
22 utom kiet, ndien kpukpru mbufo eyik. Moses ökönö
mbufo mbobi kabaña emi (edi enye itoho Moses edi oto
23 mète); mbufo enyuñ enīm owo mbobi ke sabbath. Edieke
enīmde owo mbobi ke sabbath, man ekubiat ibet Moses;
nte mbufo eyaresit ye Ami, koro 'namde idem ösöñ owo
24 ke sabbath? Èkukpe ikpe nte etiede owo ke enyin, edi
èkpe edinen ikpe.
- 25 Ndien ndusuk mbon Jerusalem edöhö ète, Nte owo emi
26 idige Enye emi mö eyomde ndiwot? Ndien sese, Enye ke
etiñ ikö añwa añwa, mö inyuñ idöhöke Enye baba ñkpö
kiet. Me ikpö owo etīm èfiök ke akpanikö ète, owo emi
27 edi Christ? Edi nyin imöfiök ebièt emi owo emi otode :
edi kini Christ edide, baba owo kiet ifiökke ebièt emi Enye
28 otode. Ndien Jesus ofiori ke temple, ekpep önyuñ ödöhö
ete, Mbufo emefiök Mi, emenyuñ èfiök ebièt emi Ami
ntode ñko; ndien Ami ndige ke Idemmi, edi Enye
29 emi ödöñde Mi edi akpanikö, emi mbufo mifiökke. Ami
möfiök Enye; koro Ami ntode ke Enye, Enye önyuñ
30 ödöñ Mi. Ndien mö eyom ndimum Enye: ndien baba
owo kiet idorike Enye ubök, koro ini Esie mika-ikemke
31 kaña. Edi ke otu owo oro ediwak owo enīm Enye ke
akpanikö; enyuñ edöhö ète, Christ ama edi, nte Enye
32 edinam midiöñö ewak èkan se owo emi anamde? Me-
Pharisee èkop nte otu owo esukde uyo etiñ ikö emi
èbaña Enye; ikpö oku ye Me-Pharisee enyuñ ödöñ
33 misuñutom ndimum Enye. Ndien Jesus ödöhö ete,
Nsuk ndodu ye mbufo ke ekpri ini kaña, ndien Ami ndakha
34 ntiene Enye emi öködöñde Mi. Mbufo eyeyom Mi,
ndien idique Mi: ndien ke ebièt eke Ami ndude, mbufo
35 ikemeke ndidi. Ndien Me-Jew edöhö kotu idemmö ète,
Owo emi edika möñ eke nyin midique Enye? Me Enye
editiene mö emi esuanade kotu Me-Greek, önyuñ ekpep
36 Me-Greek? Nsidi ikö emi Enye ödöhöde ete, Mbufo
eyeyom Mi, ndien idique Mi: ndien ke ebièt eke Ami ndude,
mbufo ikemeke ndidi?
- 37 Ekem ke akpatre usen, aqua usen usörö, Jesus ada
ofiori ete, Itöñ ama asat owo ekededi, yak enye etiene Mi
38 öñwöñ. Enye emi öbuötde idem ye Ami, nte ñwed Abasi

JOHN 8.

ödöhöde, me-akpa odu-uwem möñ eyeto enye ke esit
39 ewörö. Edi Enye ödöhö ntem abaña Spirit, emi mö emi
ëbuötde idem ye Enye edinyenede: koro mika-inöñö
Spirit kaña; koro mika-inöñö Jesus kaña uböñ.
40 Ndien ndusuk mö ke otu owo oro, adañemi mö ëkopde
mikö emi, ödöhö ëte, Ke akpanikö emi edi prophet oro.
41 Ndusuk eñwen ödöhö ëte, Emi edi Christ. Edi ndusuk
42 ödöhö ëte, Nso, nte Christ eyeto ke Galilee? Nte ñwed
Abasi idöhöke ite, Christ oto ke oruk David, önyuñ oto ke
43 Bethlehem, ekpri obio emi David okodude? Ntre eribak-
44 hare otibe ke otu owo abaña Enye. Ndien ndusuk mö
ëyom ndimum Enye; edi baba owo kiet idorike Enye
ubök.
45 Ndien misuñutom oro ëtiene ikpö oku ye Me-Pharisee;
mö ënyuñ ödöhö mö, ëte, Nsinam mbufo midaha Enye idi?
46 Misuñutom oro ëbörö ëte, Akananam owo itĩnke ikö ntre.
47 Ndien Me-Pharisee ödöhö mö, ëte, Nte mbufo nde ëmeduk
48 abiaña. Nte owo ekededi kotu mendikara me kotu Me-
49 Pharisee omonim Enye ke akpanikö? Edi otu owo emi
50 mifiökke ibet, ödödiök önö mö. Nicodemus (owo mö kiet
51 emi ekebemde iso etiene Enye) ödöhö mö, ete, Nte ibet
nyin ekpe ikpe owo, ke mibemke iso ikop uyo esie inyüñ
52 ifiök se enye anamde? Mö ëbörö enye, ëte, Nte afo nde
oto ke Galilee? Duñöre, nyuñ se nte baba prophet kiet
midakhake ida ito ke Galilee.

8 [NDIEN kpukpru owo ënyöñ ke ufök mö: edi Jesus aka
2 ke obot Olive. Ndien Enye abak ke usenubök ötöñö
ntak edi ke temple, kpukpru owo ënyuñ ëtiene Enye;
3 ndien Enye ösukhöre etie ekpep mö. Ndien me-scribe
ye Me-Pharisee ëda ñwan kiet, emi ëkemumde enye ke
4 itie efibe; ndien ke mö ëma ëkenim enye ke uföt, mö
ödöhö Enye, ëte, Andikpep, ëkemum ñwan emi ke efibe,
5 ke idem itie. Moses eteme nyin ke ibet, ete, itöñö oruk
6 owo emi ke itiat: Afo ödöhö didie abaña enye? Mö
ödöhö ikö emi, edomo Enye, man mö ënyene se edade
ëdori Enye ikö. Edi Jesus önuhö ada nuenubök Esie
7 ewet ke isöñ. Edi kini mö ëköböde ëbup Enye, Enye
emenere Idemesie önyuñ ödöhö mö, ete, Owo kotu mbufo
eke ananade ndudue, yak enye ebem iso emen itiat ötö
8 enye. Ndien Enye ötöñö ntak önuhö ada nuenubök
9 Esie ewet ke isöñ. Ndien kini mö ëkopde, mö ewöñö kiet

JOHN 8.

- kiet,  t       ke ebiowo tutu osim ukperedem : ndien Jesus osuk ikp   , ye  wan ke ebi  t eke enye adade ke
10 uf  t. Ndien Jesus emenere Idemesie,       enye, ete,  wan, m       m    ? Nte baba owo kiet ibiomke fi ?
11 Ndien enye ete, Baba owo kiet,      . Ndien Jesus ete, Ami 'nyu   mbiomke fi : ka okuo ;  t       kemi, kunam aba idi      .]
- 12 Ndien Jesus  t      ntak       m  , ete, Ami ndi u  wana ererimbot : enye eke as  nade etiene Mi idisa  ake ke ekim,
13 edi eyenyene u  wana uwem. Ntem Me-Pharisee       Enye,    , Afo et    ik   ntiense aba  a Idemfo ; ik  
14 ntiense Fo idige akpanik  . Jesus       m  , ete, Mkp      ik   ntiense mba  a Idemmi, ik   ntiense Mi edi akpanik   ; koro Ami m       ebi  t eke Ami       , ye ebi  t eke Ami       ; edi mbufo ifi      ebi  t eke Ami
15 ntode, me ebi  t eke Ami      . Mbufo       ikpe nte as  nade ye         ; Ami        ikpe baba owo kiet.
16 Ndien edieke Ami        ikpe, ikpe Mi edi akpanik   ; koro Ami menduhe ikp   , edi Ami ye       emi         
17 Mi.    ,  nyu    wet ke ibet mbufo    , ik   ntiense owo
18 iba edi akpanik  . Ami ndi enye emi nt      ik   ntiense mba  a Idemmi, ndien       emi          Mi  nyu   et   
19 ik   ntiense aba  a Mi. Ntem m         Enye,    , Us   odu m    ? Jesus       ete, Mbufo ifi      Mi, inyu   ifi            Mi : mbufo         Mi, mbufo      nyu              
20 Mi. Enye       mik   emi ke ubet un   -     , nte Enye ekpe    ke temple : ndien baba owo kiet imumke Enye ; koro ini Esie mika-ikemke ka  a.
- 21 Ndien Enye  t      ntak       m  , ete, Ami m    'ny   , ndien mbufo        Mi,  nyu          ke idi       mbufo :
22 ke ebi  t eke Ami      , mbufo ikemeke ndidi. Ndien Me-Jew          , Nte Enye ediwot Idemesie, emi Enye          ete, Ke ebi  t eke Ami      , mbufo ikemeke
23 ndidi ? Ndien Enye       m  , ete, Mbufo     eke is    ; Ami ndi eke eny    : mbufo     eke ererimbot emi ; Ami
24 ndige eke ererimbot emi. Ntre ke Ami         mbufo, nte, mbufo         ke idi       mbufo : koro ib      mbufo        ke akpanik      , Ami ndi *Enye*, mbufo
25         ke idi       mbufo. M    m         Enye,    , Afo edi anie ? Jesus       m  , ete, Kpa se Ami nd       mbufo toto ke erit     . Menyene ediwak       ndit    'nyu         ikpe mba  a mbufo : edi Enye emi          Mi edi

JOHN 8.

akpanikö; ndien ñkpö eke Ami ñkopde oto ke Enye,
27 ñkpö emi ke Ami ndöhö ererĩmbot. Mö ifiökke ite ke
28 Enye ödöhö mö abaña Ète. Ndien Jesus ödöhö ete, Ke
mbufo ěma ěmen Eyen owo ke enyöñ, ini oro ke mbufo
ědifiök ěte, Ami ndi Enye, ye nte Ami menamke ñkpö ke
Idemmi, edi Ami ndöhö ñkpö emi kpa nte Ète ekpepde
29 Mi. Ndien Enye emi ödöñde Mi odu ye Ami; Enye
ikpöñke Mi ikpöñ; koro Ami 'namde ñkpö eke ěnemde
30 Enye kpukpru ini. Nte Enye ödöhöde ikö emi, ediwak
owo ěnĩm Enye ke akpanikö.

31 Ndien Jesus ödöhö Me-Jew oro ěbuötde idem ye Enye,
ete, Mbufo ěma ědu ke ikö Mi, mbufo ědi mbet Mi
32 ke akpanikö; mbufo ěyenyuñ ěfiök akpanikö, akpanikö
33 eyenyuñ anam mbufo ědi nditö isöñ. Mö ěbörö
Enye, ěte, Nyĩn idi nditö Abraham, akananam nyĩn
iduhe ke idak baba owo kiet: didie ke Afo ödöhö ndien
34 ete, Mbufo ěyedi nditö isöñ? Jesus öbörö mö, ete,
Kakpan ke ndöhö mbufo, nte, Kpukpru owo kiet
35 kiet eke anamde idiöñkpö edi ofn idiöñkpö. Ndien
ofn itiehe ke ufök ke nsinsi: eyen etetie ke nsinsi.
36 Mödo Eyen ama anam mbufo ěkabare ědi nditö
isöñ, mbufo ěyedi nditö isöñ ke akpanikö. Möfiök
37 nte mbufo ědi nditö Abraham; edi mbufo ěyom
ndiwot Mi, koro ikö Mi minyeneke odudu ke esit
38 mbufo. Ami ndöhö ñkpö eke Ami ñkutde ye Ète
Mi: mbufo ěnyuñ ěnam ñkpö eke mbufo ěkopde ye
39 ěte *mbufo*. Mö ěbörö Enye, ěte, Ète nyĩn edi Abraham.
Jesus ödöhö mö, ete, Mbufo ěma ěkpedi nditö Abraham,
40 mbufo ěkpenam utom Abraham. Edi kemi mbufo ěyom
ndiwot Mi, kpa owo emi etĩnde akpanikö önö mbufo, eke
41 ñkopde oto ke Abasi: Abraham ikanamke ntem. Mbufo
ěnam mutom ěte mbufo. Mö ědöhö Enye, ěte, Nyĩn
idige nditö akpara; nyĩn inyene ěte kiet, *kpa* Abasi.
42 Jesus ödöhö mö, ete, Abasi ama ěkpedi Ète mbufo,
mbufo ěkpema Mi: koro Ami ntode ke Abasi ndi; koro
Ami menyuñ ndige ke Idemmi, edi Enye öködöñ Mi.
43 Nsinam mbufo mifiökke ikö Mi? Edi suk koro mbufo
44 mikemeke ndikop uyo Mi. Mbufo ědi eke ěte mbufo
devil, mbufo ěnyuñ ěma ndinam idiök itöñ ěte mbufo.
Enye edi owot-owo ötöñöde ke eritöñö, ikönyuñ idaha ke
akpanikö, koro akpanikö miduhe kesit esie. Kini enye
osude nsu, enye ödöhö oto ke idemesie: koro enye edide

JOHN 9.

45 osu-nsu, ye ète nsu. Edi koro Ami ntĩnde akpanikö,
 46 mbufo inĩmke Mi ke akpanikö. Anie owo mbufo owut
 Mi idiõñkpö Mi? Edieke Ami ndõhöde akpanikö, nsinam
 47 mbufo minĩmke Mi ke akpanikö? Enye emi otode ke
 Abasi okop ikö Abasi: oto ke ñkpö emi mbufo ikopke,
 48 koro mbufo mitoho ke Abasi. Me-Jew ëbörö ète,
 Nte nyĩn itĩmke idõhö ite, Afo edi owo Samaria,
 49 õmõnyuñ enyene demon? Jesus õbörö ete, Ami 'nyeneke
 demon; edi Ami ñkpono Ète Mi, ndien mbufo èsuene Mi.
 50 Edi Ami nyomke ukpono Idemmi: Kiet odu emi oyomde
 51 *ukpono Mi* õnyuñ ekpede ikpe. Kakpan ke ndõhö
 mbufo, nte, Edieke owo onĩmde uyo Mi, enye idique mkpa
 52 ke nsinsi. Me-Jew ëdõhö Enye, ète, Nyĩn imõfiök ndien ite,
 Afo emenyene demon. Abraham ama akpa, ye me-pro-
 phet; ndien Afo ete, Edieke owo onĩmde ikö Fo, enye
 53 iditabike mkpa ke nsinsi. Nte Afo omokpon akan ète
 nyĩn Abraham emi akpade? me-prophet ënyuñ ëkpaña:
 54 Afo onĩm Idemfo ke anie? Jesus õbörö ete, Ami 'ma
 ñkpono Idemmi, ukpono Mi idige ñkpö: ke edi Ète Mi eke
 okponode Mi; emi mbufo ëdõhöde ète, Enye edi Abasi
 55 mbufo; ndien mbufo ifiökke Enye: ke edi Ami mõfiök
 Enye; ndien edieke Ami ñkpõdõhöde nte, mfiökke Enye,
 mkpakabare ndi osu-nsu nte mbufo: edi Ami mõfiök Enye,
 56 'nyuñ 'nĩm ikö Esie. Ète mbufo Abraham akadara ndikut
 57 usen Mi; ndien enye okut, õnyuñ adaresit. Ndien
 Me-Jew ëdõhö Enye, ète, Afo usĩmke kaña isua aba ye
 58 duop, nte Afo omokut Abraham? Jesus õbörö mö,
 ete, Kakpan ke ndõhö mbufo, nte, Ke Abraham mika-
 59 iduhe kaña, Ami ndodu. Oto do mö ëmen itiat ète itõñö
 Enye: edi Jesus odip Idemesie, õnyuñ õwörö ke temple.

9 NDIEN nte Enye asañade ebe, Enye okut owo emi edide
 2 'nan oto ke emana esie. Ndien mbet Esie ëbup Enye, ète,
 Rabbi, anie akanam idiõñkpö, ndi owo emi, me ndi ète ye
 3 eka esie, eke esinde enye amana 'nan? Jesus õbörö ete, Idige
 owo emi inyuñ idige ète ye eka esie ëkenam idiõñkpö: edi
 4 man utom Abasi ëkpeyarare ke enye. Nyĩn inyene ndinam
 utom Enye emi õkõdõñde Mi, kini edide uwemeyo:
 okoneyo ke edi emi baba owo kiet mikemeke ndinam utom.
 5 Adaña ini nte Ami ndodu ke ererĩmbot, Ami ndi uñwana
 6 ererĩmbot. Ke Enye ama õkõdõhö ntem, Enye õkõk
 etap ke isõñ, anam mbat ke etap oro, ndien eyet mbat

JOHN 9.

- 7 oro ke enyĩn esie, ɔnyuñ ɔdɔhɔ enye, ete, Ka keyere ke
mkpɔdiɔkhɔmɔñ Siloam (emi ɔwɔrɔde ete, Enye emi
ɛdɔñde). Ndien Enye aka ekeyere, ɔnyuñ afiak edi okut
8 usuñ. Ndien mbɔhiduñ ye mɔ emi ɛkekutde enye ke
mbemiso ɛte, enye ekedi ebeñe ebeñe, ɛdɔhɔ ɛte, Nte emi
9 idige enye oro eketiede ebeñe ebeñe? Me-owo efen ɛte,
10 Edi enye : efen ɛte, Idige, edi ebiɛt enye. Enye ɔdɔhɔ ete,
Ami ndi enye. Ndien mɔ ɛdɔhɔ enye, ɛte, Didie ndien ke
11 ɛketat fi enyĩn? Enye ɔbɔrɔ ete, Owo oro ekerede Jesus
akanam mbat eyet mi ke enyĩn, ɔnyuñ ɔdɔhɔ mi, ete, Ka
ke Siloam, nyuñ yere : ntre ami ñka ñkeyere, 'nyuñ ñkut
12 usuñ. Ndien mɔ ɛdɔhɔ enye, ɛte, Enye odu mɔñ? Enye
ete, Mfiɔkke.
- 13 Mɔ ɛda enye emi ekedide 'nan ɛtiene Me-Pharisee.
14 Ndien ekedi ke sabbath ke Jesus akanam mbat ɔnyuñ
15 atat enye enyĩn. Ntem Me-Pharisee ɛtɔñɔ ntak ɛbup
enye ñko, nte enye okokutde usuñ. Ndien enye ɔdɔhɔ
mɔ, ete, Enye eyet mbat ke enyĩn mi, ndien ami ñkeyere
16 'nyuñ ñkut usuñ. Ndien ndusuk Me-Pharisee ɛdɔhɔ ɛte,
Owo emi itoho ke Abasi, koro Enye minimke sabbath.
Edi owo eñwen ɛte, Didie ke owo emi edide abiat-ibet
ekeme ndinam midiɔñɔ ntem? Ndien mɔ ɛbakhare.
17 Ndien mɔ ɛtɔñɔ ntak ɛdɔhɔ 'nan oro, ɛte, Afo ɔdɔhɔ
didie abaña Enye, sia Enye atatde fi enyĩn? Enye ɔbɔrɔ
18 ete, Enye edi prophet. Edi Me-Jew inimke ke akpanikɔ
ibaña enye, ite, enye ekedi 'nan, ndien okut usuñ,
tutu mɔ ɛkot ɛte ye eka owo emi ɛkenamde enye okut
19 usuñ ɛdi, ɛnyuñ ɛbup mɔ, ɛte, Nte owo emi edi eyen mbufo,
emi mbufo ɛdɔhɔde ɛte enye akamana 'nan? Didie ndien
20 ke enye okut usuñ kemi? Ẹte ye eka esie ɛbɔrɔ ɛte,
Nyĩn imɔfiɔk ite enye edi eyen nyĩn, ye nte enye akama-
21 nade 'nan : edi nte enye okutde usuñ kemi, nyĩn ifiɔkke ; ye
owo emi atatde enye enyĩn, nyĩn ifiɔkke : ɛbup enye ;
22 enye okpon ; enye eyetiñ ikɔ idemesie. Ẹte ye eka
esie ɛdɔhɔ ikɔ emi, koro mɔ ɛfeghede Me-Jew : koro
Me-Jew ɛma ɛkediomi ɛte, owo ama onyime Enye,
ete, Enye edi Christ, ɛyebĩn enye ɔwɔrɔ ke synagogue.
23 Oto oro ɛte ye eka esie ɛdɔhɔ ɛte, enye okpon ; ɛbup enye.
24 Ntre mɔ ɛtɔñɔ ntak ɛkot owo oro ekedide 'nan edi, ɛnyuñ
ɛdɔhɔ enye, ɛte, Nɔ Abasi ukpono : nyĩn imɔfiɔk ite owo
25 emi edi abiat-ibet. Edi enye ɔbɔrɔ ete, Me Enye edi
abiat-ibet, ami mfiɔkke ; ñkpɔ kiet ke ami mfiɔk,

JOHN 10.

26 nte ami ñkedide 'nan, kemi mokut usuñ. Ndien mö
 27 ãdöhö enye, ête, Enye akanam nso ye afo? Didie ke
 28 Enye atat fi enyîn? Enye öbörö mö, ete, Ami 'ma ndöhö
 29 mbufo kpa idaha emi, ndien mbufo ikopke: nsinam
 30 mbufo ëyomde nditöñö nta ñkop? nte mbufo ñko
 31 ëyom ndikabare ndi mbet Esie? Ndien mö ësuñi enye,
 32 ënyuñ ãdöhö ête, Afo edi owo mbet Esie; edi nyîn idi
 33 mbet Moses. Nyîn imöfiök ite, Abasi öködöhö ye
 34 Moses: edi ama edi owo emi, nyîn ifiökke ebiët eke
 35 Enye otode. Owo oro ödöhö mö, ete, Emi edi
 36 utibe ñkpö, nte mbufo mifiökke ebiët emi Enye otode,
 37 ndien Enye ama atat mi enyîn. Nyîn imöfiök ite Abasi
 38 ikopke uyo mebiat-ibet: edi owo ekededi ama edi atuak-
 39 ibuat 'nö Abasi, önyuñ anam se Enye amade, Enye okop
 40 uyo esie. Toto ke eritöñö ererĩmbot owo isikopke ite, owo
 41 ekededi ama atat enyîn owo emi akamanade 'nan. Owo
 42 emi mikpotoho ke Abasi, Enye ikpekemeke ndinam ñkpö.
 43 Mö ãdöhö enye, ête, Afo akamana öfuri ke idiönkpö, ndien
 44 nte afo ke ekpep nyîn? Ndien mö ëbĩn enye.
 45 Jesus okop ete mö ëma ëbĩn enye; ndien ke okutde enye,
 46 Enye ödöhö ete, Nte afo omonĩm Eyen Abasi ke akpanikö?
 47 Enye öbörö ete, Enye edi anie, Öböñ, man 'nĩm
 48 Enye ke akpanikö? Jesus ödöhö enye, ete, Afo ama
 49 okut Enye, önyuñ edi Enye etiñ ikö emi ye afo. Ndien
 50 enye ete, Öböñ, ami monĩm ke akpanikö. Ndien enye
 51 atuak ibuat önö Enye. Ndien Jesus ödöhö ete, Kabaña
 52 ikpe ke Ami ndi ke ererĩmbot emi, man mö emi mique
 53 ñkpö ëkpekut, man mö emi ëkutde ñkpö ëkpenyuñ
 54 ëkabare edi 'nan. Me-Pharisee emi ëdude ye Enye ëkop
 55 ikö oro, ënyuñ ãdöhö Enye, ête, Nte nyîn nde idi 'nan?
 56 Jesus ödöhö mö, ete, Mbufo ëkpedi 'nan, mbufo ikpenyeneke
 57 idiönkpö: edi kemi mbufo ãdöhö ête, Nyîn imokut ñkpö:
 58 idiönkpö mbufo osuk ododu.

10 KAKPAN ke ndöhö mbufo, nte, Owo emi misañake ke
 2 usuñ iduk ke ufök-eröñ edi ödökde ke usuñ efen, kpa enye
 3 edi inö ye ñwo. Edi owo emi asañade ke usuñ oduk edi
 4 andikpeme meröñ. Etie-usuñ eberere önö enye; meröñ
 5 ënyuñ ëkop uyo esie: ndien enye okot meröñ esiemö ke
 6 enyĩñ, önyuñ ada mö öwörö. Ke enye ama okosioño
 7 kpukpru meröñ esiemö, enye ebem mö iso asaña, meröñ
 8 ënyuñ ëtiene enye: koro mö ëdiönöde uyo esie. Ndien

JOHN 10.

- mō iditienেকে esen owo, edi ēyefeñe ēkpōñ enye : koro mō
6 midionñoke uyo esen owo. Jesus otop ñke emi önö mö ;
edi mö ifiökke ñkpö oro Enye ödöhöde mö.
- 7 Ndien Jesus ötönö ntak ödöhö mö, ete, Kakpan ke
8 ndöhö mbufo, nte, Ami ndi usuñ merön. Kpukpru owo
emi ebemde Mi iso ēdi inö ye ñwo : edi merön ikopke
9 uyo mö. Ami ndi usuñ : edieke owo odukde ke Ami,
ēyenyaña enye, enye eyenyuñ oduk önyuñ öwörö, önyuñ
10 okut udia. Inö idige, iböhöke man oyip, önyuñ owot,
önyuñ osobo : Ami ñkedi man mö ēnyene uwem, ēnyuñ
11 ēnyene enye awak akan. Ami ndi eti andikpeme erön :
eti andikpeme erön önö uwem Esie kabaña merön.
- 12 Anam-utom ke okuk, emi midige andikpeme erön, emi
merön minyeneke enye, okut nte ekpe edide, önyuñ
ökpön merön, efeghe, ndien ekpe omum mö, önyuñ
13 asuan mö ; (*enye efeghe* koro enye edide anam-utom ke
14 okuk, minyuñ ikereke merön. Ami ndi eti andikpeme
15 erön ; ndien Ami mödiönö okimmö, okimmö ēnyuñ
ēdiönö Mi, kpa nte Ète ödiönöde Mi, Ami mönyuñ ndiönö
16 Ète ; ndien Ami 'nö uwem Mi kibuot merön. Ndien Ami
menyene merön eñwen, emi midige eke ufök emi : mö ke
Ami 'nyene ndida ndi ñko, mö ēyenyuñ ēkop uyo Mi ;
ndien mö ēyekabare ēdi otu erön kiet, Andikpeme erön
17 önyuñ edi kiet. Oto emi Ète ama Mi, koro Ami nyakde
18 uwem Mi, man ntönö ntak nda enye. Baba owo kiet
iböhö Mi uwem, edi Ami 'ma nyak enye ke Idemmi.
Ami menyene odudu ndiyak enye, mönyuñ 'nyene odudu
nditönö ntak nda enye. Item emi ke Ami ñköbö Ète Mi.
- 19 Eribakhare ötönö ntak otibe kotu Me-Jew kabaña
20 me-ikö emi. Ndien ekese mö ödöhö ète, Enye enyene
demon, önyuñ adama idat ; nsinam mbufo ēkpañde utön
21 önö Enye ? Owo eñwen ebörö ète, Memö emi idige ikö
owo emi enyenede demon. Nte demon emekeme nditat
'nan enyīn ?
- 22 Ndier edi ini usörö erinam *temple* asana ke Jerusalem :
23 önyuñ edi ini etuep ; ndien Jesus asasaña ke temple ke
24 eteghe Solomon. Ndien Me-Jew ēkanare Enye ekuk,
ēnyuñ ödöhö Enye, ète, Adaña didie ke Afo edisin nyīn
25 iyik ? Afo ama edi Christ, tīm sian nyīn. Jesus öbörö
mö, ete, Ami 'ma nsian mbufo, ndier mbufo inīmke ke
akpanikö : me-utom oro Ami 'namde ke enyīn Ète Mi
26 etiñ ikö ntiense ēbaña Mi. Edi mbufo inīmke ke akpan-

JOHN 11.

27 ikö, koro mbufo mitoho ke meröñ Mi. Meröñ Mi ëkop
 uyo Mi, Ami mönyuñ ndiöñö mö, mö ënyuñ ëtiene Mi :
 28 ndien Ami 'nö mö nsinsi uwem ; mö idinyuñ itakke ke
 nsinsi, baba owo kiet idinyuñ ifabakere mö ke ubök Mi
 29 isio. Ète Mi, emi adade mö önö Mi, okpon akan kpukpru ;
 ndien baba owo kiet ikemeke ndifabare mö ke ubök Ète
 30 nsio. Ami ye Ète Mi idi kiet. Me-Jew ëtöñö ntak ëtañ
 32 itiat ëte itöñö Enye. Jesus öbörö mö, ete, 'Ma ñwut mbufo
 ediwak nti utom ëto ke Ète ; ke ewe utom oro ke mbufo
 33 ëyom nditöñö Mi ke itiat ? Me-Jew ëbörö Enye, ëte,
 Kabaña eti utom nyin itöñöke Fi ke itiat, edi kabaña
 isuñi ; ye, koro Afo, emi edide owo, onimde idem nte Abasi.
 34 Jesus öbörö mö, ete, Nte ikewetke ke ibet mbufo ite, Ami
 35 ñködöhö nte, Mbufo ëdi me-abasi ? Edieke Enye okokot-
 de mö me-abasi, emi uyo Abasi eketienede mö (ndien ñwed
 36 Abasi ikemeke ndikpu), nte mbufo ëmedöhö ëbaña Enye
 emi Ète akanamde asana ökönyuñ ödöñde edi ke ererimbot,
 ete, Afo omosuñi ; koro Ami ndöhöde nte, Ami ndi Eyen
 37 Abasi ? Edieke Ami menamke mutom Ète Mi, ëkunim Mi
 38 ke akpanikö. Edi Ami 'ma 'nam mö, okposuk edi mbufo
 minimke Mi ke akpanikö, ënim idem utom oro ke akpan-
 ikö : man mbufo ëfiök, man otim añaña önö mbufo ñko,
 39 ete, Ète odu ke esit Mi, ye Ami ke esit Ète. Mö ëtöñö
 ntak ëyom ndimum Enye : ndien Enye öwörö öböhö mö
 ke ubök.
 40 Ndien Enye ötöñö ntak ebe Jordan aka ke ebiët emi
 41 John ekebemde iso onim baptism ; önyuñ etie do. Ndien
 ediwak owo ëtiene Enye ; ndien mö ëdöhö ëte, Ke akpanikö
 John ikanamke idiöñö : edi kpukpru ñkpö oro John
 42 öködöhöde abaña owo emi ëdi akpanikö. Ndien ediwak
 owo ënim Enye ke akpanikö do.

11 EKEM owo kiet emi ekerede Lazarus, owo Bethany, obio
 2 Mary ye Martha eyen-eka esie, ödöñö. Edi Mary oro
 akadade ufuöñkpö eyet Öböñ, ökönyuñ öquöhörede ukot
 Esie ke idet esie, emi Lazarus eyen-eka esie eren ödöñöde.
 3 Ndien nditö-eka iban oro ëdöñ ëkedöhö Enye, ëte, Öböñ,
 4 sese, enye emi Afo amade ke ödöñö. Edi kini Jesus
 okopde, Enye ödöhö ete, Udöñö emi idige eke mkpa, edi
 kabaña ukpono Abasi, man oto do ëkpono Eyen Abasi.
 5 Jesus ama Martha, ye eyen-eka esie añañwan, ye Lazarus.
 6 Mödo kini Enye okopde ete enye ke ödöñö, Enye osuk

JOHN 11.

7 etie usen iba ke ebiēt oro Enye odude. Ndien ke emi
 ebede Enye ödöhö mbet Esie, ete, Ēyak nyin itöñö ntak
 8 ika ke Judæa. Mbet Esie ödöhö Enye, ēte, Rabbi, kpa
 idahemi ke Me-Jew ēkeyom nditöñö Fi ke itiat; ndien
 9 nte Afo möñ ötöñö ntak aka do? Jesus öbörö ete, Nte
 idige ñkanika duopeba edu ke uwemeyo? owo ama asaña
 ke uwemeyo, enye ituakke ukot, koro enye okutde uñwana
 10 ererimbot emi. Edi owo ama asaña ke okoneyo, enye
 11 atuak ukot, koro uñwana, miduhe ye enye. Enye
 ödöhö ikö emi: ndien ke ama öködöhö ntem, Enye
 ödöhö mö, ete, Lazarus ufan nyin ke ede; edi Ami möñ
 12 ñka, man ndemere enye ke idap. Mbet Esie ödöhö Enye,
 ēte, Öböñ, enye ama ede idap, idem eyefere enye.
 13 Jesus ödöhö abaña mkpa esie: edi mö ekere ēte, Enye
 14 ödöhö abaña eriduök-odudu ke idap. Ndien Jesus
 15 otim ödöhö mö, ete, Lazarus akpa. Ndien esit adat Mi
 kabaña mbufo koro Ami meñkoduhe do, man mbufo
 16 enim ke akpanikö; edi eyak nyin ibine enye. Ndien
 Thomas, emi ekerede Didymus, ödöhö mbet enwen, ete,
 Yak nyin inyuñ ika man ikpaña ye Enye.
 17 Ntre kini Jesus osimde do, Enye okut ete enye ama
 18 ana ke udi usen inañ. Bethany ekpere Jerusalem,
 19 oyom usuñ ñkpö nte mile iba; ndien ediwak Me-Jew ēma
 etiene Martha ye Mary, man ödöñ mö esit kabaña eyen-eka
 20 mö. Ntem kini Martha okopde ete Jesus ke edi, enye aka
 21 okosobo ye Enye: edi Mary osuk etie ke ufök. Ndien
 Martha ödöhö Jesus, ete, Öböñ, Afo ama okpodu mi, eyen-
 22 eka mi ikpekpaha. Ndien kpa kemi möfiök nte, ñkpö
 23 ekededi Afo edibeñede Abasi, Abasi eyenö Fi. Jesus ödöhö
 24 enye, ete, Eyen-uka eyetöñö ntak eset. Martha ete Enye,
 25 Möfiök nte enye eyeset ke eriset ke akpatre usen. Jesus
 ödöhö enye, ete, Ami ndi eriset ye uwem: enye emi
 öbuötde idem ye Ami, okposuk edi nte enye akpade,
 26 eyedu uwem: ndien owo ekededi emi odude uwem önyuñ
 öbuötde idem ye Ami idikpaha ke nsinsi. Nte afo omonim
 27 emi ke akpanikö? Enye öbörö Enye, ete, Ih, Öböñ, ami
 monim ke akpanikö nte, Afo edi Christ Eyen Abasi, kpa
 28 Enye emi edide ke ererimbot. Ndien ke enye ama
 öködöhö emi, enye aka okokot Mary eyen-eka esie ke
 29 ndibe, ete, Andikpep mömi, ke önyuñ okot fi. Ndien kini
 enye okopde, enye adakha kenyöñ iwiwa etiene Enye.
 30 (Jesus ika-idukke ke ekpri obio oro kaña, edi osuk odu ke

JOHN 11.

- 31 ebiēt oro Martha okosobode ye Enye.) Ndien kini Me-Jew emi ēdude ye enye ke ufök, ēnyuñ ēdōñde enye esīt. ēkutde nte Mary adakhade kenyōñ iwiwa ōnyuñ ōwöröde, mö ētiene enye, ēkere ēte, enye aka ke udi nditua eyet do.
- 32 Ndien Mary, kini enye osīmde ebiēt oro Jesus odude, ōnyuñ okutde Enye, öduö Enye ke ukot, ōnyuñ ödöhö Enye, ete,
- 33 Öböñ, Afo ama okpodu mi, eyen-eka mi ikpekpaha. Ntem kini Jesus okutde enye atuade eyet, ye Me-Jew emi ētienede enye nte ētuañade ñko, Enye omum ke spirit,
- 34 mfukhö ōnyuñ anam Enye, Enye ōnyuñ ödöhö ete, Mbufo ēkenīm enye ke ebiēt ewe? Mö ödöhö Enye, ēte,
- 35 Öböñ, Di dise. Jesus atua eyet. Ntem Me-Jew ödöhö
- 36 ēte, Sese, nte Enye amade enye! Edi ndusuk mö ödöhö
- 37 ēte, Nte owo emi akatatde enyīn enye emi ekedide 'nan,
- 38 ikpekemeke ndikpan owo emi ndikpa? Ndien Jesus ötōñö ntak omum ke esīt Esie ōnyuñ edi ke udi. Udi edi
- 39 aba, itiat ōnyuñ ebere ke inua esie. Jesus ödöhö ete, Mbufo ēmen itiat ēfep. Martha, eyen-eka akpa-mkpa, ödöhö Enye, ete, Öböñ, kemi enye ke etebe: koro usen
- 40 inañ ēbe nte enye akakpa. Jesus ödöhö enye, ete, Nte Ami ñködöhöke fi, nte, Afo ama onīm ke akpanikö, afo eyekut
- 41 ubōñ Abasi? Ndien mö ēmen itiat ēfep. Ndien Jesus emenere enyīn Esie, ōnyuñ ödöhö ete, Ète, mökōm Fi
- 42 koro Afo okopde uyo Mi. Ndien Ami möfiök nte Afo okokop uyo Mi kpukpru ini: edi Ami ndöhö ntem kabaña otu owo emi ēdade mi, man mö ēnīm ke akpanikö
- 43 ēte Afo öködōñ Mi. Ndien ke Enye ama öködöhö ntre,
- 44 Enye ofiori ke ökpösōñ uyo, ete, Lazarus, wörö di. Akpa-mkpa öwörö edi, ewañ enye ubök ye ukot ke öfōñ udi; ēnyuñ ēböp iso esie ke ubak öfōñ. Jesus ödöhö mö, ete, Ètat enye, ēnyuñ ēsana enye ēyak.
- 45 Ndien ediwak Me-Jew, emi ēketienede Mary ēkenyuñ
- 46 ēkutde se Enye anamde, ēnīm Enye ke akpanikö. Edi ndusuk mö ēdakha ētiene Me-Pharisee, ēnyuñ ēbuk ēnō mö se Jesus akanamde.
- 47 Ndien ikpö oku ye Me-Pharisee ēkot esop ēbono, ēnyuñ ödöhö ēte, Nso ke nyīn inam ntem? koro owo emi ke
- 48 ananam ediwak midiōñö. Nyīn ima iyak Enye anam ntem, kpukpru owo ēyenīm Enye ke akpanikö: ndien
- 49 Me-Roman ēyedi ēdibö nyīn obio ye idut nyīn. Edi Caiaphas, owo mö kiet, emi edide aqua oku ke isua oro,
- 50 ödöhö mö, ete, Mbufo ifiökke baba ñkpö kiet, mbufo inyuñ

JOHN 12.

ique ite öfön nte owo kiet akpakpade kibuot mblobio,
51 man öfuri obio ökunyañ etik. Enye idöhöke ntem
ke idemesie : edi koro enye edide aqua oku ke isua oro,
enye etiñ prophecy ete, Jesus edikpa kibuot obio oro ;
52 ndien idige kibuot obio oro ikpöñ, edi man Enye obon
53 ötö kiet kpukpru nditö Abasi emi esuanade. Ntre
ötöñöde ke usen oro mö ediomini ndiwot Enye.

54 Mödo Jesus isañake aba añwa añwa kuföt Me-Jew, edi
adakha do aka ke ebiët emi ekperede wilderness, okoduk ke
obio emi ekerede Ephraim ; önyañ etie do ye mbet Esie.
55 Passover Me-Jew ekpere : ndien ediwak owo eto ke
iñwañ edök eka ke Jerusalem ebem passover iso, ndinam
56 idemmö esana. Ndien mö eyom Jesus, enyañ edöhö
kiet ye eken nte mö edade ke temple, ete, Mbufo ekere
57 didie ? Nte Enye ididige usörö ? Ndien ikpö oku ye
Me-Pharisee ema ewuk ete, owo ekededi ama öfiök
ebiët emi Enye odude, yak enye asian, man mö emum
Enye.

12 NDIEN Jesus ebem passover iso usen itiokiet edi ke
Bethany, ebiët eke Lazarus odude, emi Jesus akanamde
2 enye eset ke mkpa. Ndien mö enam usörö enö Enye
do : ndien Martha otim ñkpö ; edi Lazarus edi owo mö
3 kiet emi etiede ke itie-udia ye Enye. Ntem Mary ada
pound ufuöñkpö spiknard, ata ñkpö uto, eyet ukot Jesus,
önyañ öquöhöre ukot Esie ke idet esie : ndien utebe
4 ufuöñkpö öyöhö ufök. Edi Judas Iscariot, owo mbet
5 Esie kiet, emi editapde Enye, ödöhö ete, Nsinam
minyamke ufuöñkpö emi ibö okuk ikie ita, inö ubuene ?
6 Enye idöhöke ntem koro enye ekerede ubuene ; edi
koro enye edide inö, önyañ akamade ekepat, ndien ososio
7 se isinede kesit. Ntem Jesus ödöhö ete, Eyak enye anam
8 emi abaña usen eribuk Mi. Koro mbufo enyenede
mubuene ye mbufo kpukpru ini ; edi mbufo inyeneke
Mi kpukpru ini.

9 Ndien mbiobio Me-Jew ekop ete Enye odu do : ndien
mö edi, idige kabaña Jesus ikpöñ ikpöñ, edi man mö
enyañ ekut Lazarus, emi Enye akanamde eset ke mkpa.
10 Edi ikpö oku ediomini ete ikpewot Lazarus ñko, koro
11 otode ke enye ediwak Me-Jew edakha enyañ enim Jesus
ke akpanikö.

12 Mkpöñ aqua otu owo emi ekedide usörö, ke mö ekopde

JOHN 12.

13 ēte Jesus ke asaña edi ke Jerusalem, ēda ndak eyop
ēwōñö ndisobo ye Enye, ēnyuñ ēfiori ēte,

Hosanna :

Ētoro Enye emi edide ke enyiñ Jehovah,

Kpa Edidem Israel.

14 Ndien adañemi Jesus okutde abak ass, Enye odoro kesit,
nte ēwetde ēte,

15 Kufeghe, Adiaha Zion :

Sese, Edidem fo ke edi,

Ke odoro abak ass.

16 Mbet Esie ifiökke ñkpö emi ke akpa : edi kini Jesus
ama okoduk ke uböñ, ndien mö ēti ēte, ēkewet
ñkpö emi ēbaña Enye, ēte, mö ēkenyuñ ēnam ñkpö emi

17 ēnö Enye. Ndien otu owo emi ēkedude ye Enye kini
Enye okotde Lazarus öwörö ke udi, önyuñ anamde Enye

18 eset ke mkpa, ēdöhö ikö ntiense. Oto ke ñkpö emi ñko
otu owo ēka ēkesobo ye Enye, koro mö ēkopde ēte, Enye

19 ama anam idiöñö emi. Ntem Me-Pharisee ēdöhö
kotu idemmö ēte, Ēse nte mbufo mikemeke ñkpö : sese,
ererimbot ke etiene Enye.

20 Ndusuk Me-Greek ēdu kotu mö emi ēdökde ēka

21 ndituak ibuoṭ ke usörö : ndien memö emi ētiene Philip,
emi otode ke Bethsaida ke Galilee, ēnyuñ ēbup enye, ēte,

22 Öböñ, nyin iyom ndikut Jesus. Philip edi edidöhö

23 Andrew : Andrew ye Philip edi edidöhö Jesus. Ndien
Jesus öbörö mö, ete, Ini ekem, nte ēkpenöde Eyen owo

24 uböñ. Kakpan ke ndöhö mbufo, nte, Ke mkpasip ibokpot
miduöhö ke isöñ inyuñ ikpa, enye osuk odu ke idemesie
ikpöñ ; edi enye ama akpa, enye oñwom ediwak mfri.

25 Enye emi amade uwem esie öduök enye ; ndien enye emi
asuade uwem esie ke ererimbot emi eyenim enye önö

26 nsinsi uwem. Owo ekededi ama anam ñkpö önö Mi, yak
enye ebine Mi ; ndien ebiēt eke Ami ndude, do ke asañ-
utom mi edinyuñ odu ñko : owo ama anam ñkpö önö

27 Mi, Ēte Mi eyekpono enye. Kemi spirit Mi öfukhö ;
ndien nso ke Ami ndidöhö ? Ēte, nyaña Mi ke ñkanika
emi. Edi kabaña ñkpö emi ke Ami ndi nsim ñkanika

28 emi. Ēte, kpono enyiñ Fo. Ndien uyo oto ke enyöñ
ete, Ami 'ma ñkpono enye, nyenyuñ ntöñö ntak ñkpono

29 enye ñko. Ndien otu owo emi ēdade do ēnyuñ ēkopde,
ēdöhö ēte, enyöñ atuak : mö eñwen ēte, Angel etiñ

30 ikö ye enye. Jesus ödöhö ete, Uyo emi idige kabaña

JOHN 12.

31 Mi, edi kabaña mbufo. Emi edi ini ikpe ererĩmbot
32 emi: kemi eyeduök öböñ ererĩmbot emi. Ndien Ami,
ke ëma ëmen Mi ëkpöñ isöñ, nyedudi kpukpru owo
33 ëtiene Mi. Enye ödöhö emi owut oruk mkpa eke Enye
34 edikpade. Ndien otu owo ëbörö Enye, ëte, Nyin ima
ikop ke ibet ite, Christ ododu ke nsinsi: ndien didie
ke Afo ödöhö ete, Ënyene ndimen Eyen owo kenyöñ? anie
35 edi Eyen owo emi? Ntem Jesus ödöhö mö, ete, Ke ini
esisit kaña uñwana ododu kotu mbufo. Ësaña adaña ini
nte mbufo ënyenede uñwana, man ekim okusim mbufo:
ndien enye emi asañade ke ekim ifiökke ebiët eke enye
36 akade. Adaña ini nte mbufo ënyenede uñwana, ëbuöt
idem ke uñwana, man mbufo ëkabare ëdi nditö uñwana.
37 Jesus ödöhö ñkpö emi, önyuñ adakha odibe mö. Edi
okposuk edi nte Enye anamde adaña ediwak midiöñö
38 oro kiso mö, mö ibuötke idem ye Enye: man ikö prophet
Isaiah osu emi enye öködöhöde ete,

Öböñ, anie onim mbuk nyin ke akpanikö?

Ubök Jehovah önyuñ ayarare önö anie?

39 Oto ke ñkpö emi mö ikemeke ndinim ke akpanikö, koro
Isaiah ötöñöde ntak ödöhö ete,
40 Enye ama otibi mö enyin, önyuñ anam esit mö ösöñ;
Mbak mö ëdida enyin mö ëkut, önyuñ ëda esit mö ëfiök,
Ënyuñ ëkabare,
Ndien Ami mkpökök udöñö mö.
41 Isaiah ödöhö me-ñkpö emi, koro enye okutde uböñ esie;
42 ndien enye ödöhö abaña Enye. Edi kpa ediwak mendi-
kara ënim Enye ke akpanikö; edi oto ke Me-Pharisee
mö iyarakere, mbak mö ëdibin mö ke synagogue ëfep:
43 koro mö ëmade ukpono owo ëkan ukpono Abasi.
44 Ndien Jesus ofiori önyuñ ödöhö ete, Enye emi öbuötde
idem ye Ami, ibuötke idem ye Ami, edi ye Enye emi
45 öködöñde Mi. Ndien enye emi okutde Mi, okut Enye
46 emi öködöñde Mi. Ami medi nte uñwana ke ererĩmbot,
man owo ekededi emi öbuötde idem ye Ami okutie ke
47 ekim. Ndien owo ekededi ama okop ikö Mi, ndien
minimke mö, Ami ñkpehe ikpe esie: koro Ami ñkedige
48 ndikpe ikpe ererĩmbot, edi ndinyaña ererĩmbot. Enye
emi esinde Mi, minyuñ ikopke ikö Mi, enyene kiet emi
ekpede ikpe esie: ikö oro Ami ndöhöde, kpa enye edikpe
49 ikpe esie ke akpatre usen. Koro Ami ñködöhöke oto ke
Idemmi; edi Ëte emi öködöñde Mi, Enye ama eteme

JOHN 13.

50 Mi, se Ami ñkpodöhöde ye se Ami ñkpetiñde. Ndien Ami möfiök nte item Esie edi nsinsi uwem : mödo me-ñkpö eke Ami ntñde, kpa nte Ète öködöhöde Mi, ntre ke Ami ntñ.

13 Ke usörö passover mika-itöñöke kaña, Jesus, ke öfiökde ete, ini Esie ama edi nte Enye akpadakhade öwörö ke ererimbot emi, etiene Ète, ke erima Esiemö emi edude
 2 ke ererimbot, Enye amama mö osim akpatre. Ndien ke ini udia mbubreyo, ke devil esinde ke esit Judas Iscariot
 3 eyen Simon nditap Enye, *Jesus* öföfiök ete, Ète ama ada kpukpru ñkpö esin ke ubök Esie, ye nte Enye otode
 4 ke Abasi önyuñ oyomde nditiene Abasi, adakha ökpön itie-udia, önyuñ ökpönöre me-öföñidem Esie onim ; önyuñ
 5 ada uquöhöre-idem öböp Idemesie. Ndien Enye ötökhö möñ esin ke uyet-ubök, önyuñ ötöñö ndiyet mbet Esie
 6 ukot, 'nyuñ 'nquöhöre mö ke uquöhöre-idem eke Enye öböböde. Ntre Enye osim Simon Peter. Enye ödöhö
 7 Enye, ete, Öböñ, nte Afo möñ eyet ukot mi ? Jesus öbörö enye, ete, Se Ami 'namde afo ufiökke kemi : edi afo eyefiök
 8 ke ini iso. Peter ödöhö Enye, ete, Afo uduyetke ukot mi ke nsinsi. Jesus öbörö enye, ete, Ke Ami menyetke
 9 fi, afo unyeneke udeme ye Ami. Simon Peter ödöhö Enye, ete, Öböñ, idige ukot mi ikpön, edi ubök ye ibuo
 10 mi nde. Jesus ete enye, Enye emi eyerede möñ ama iyomke aba ndiyere iböhöke ukot esie, edi asana öfuri
 11 öfuri : ndien mbufo emesana, edi idige kpukpru. Koro Enye öfiökde enye emi editapde Enye ; mödo Enye ödöhö ete, Idige kpukpru mbufo esana.
 12 Ntre ke Enye ama ekeyet ukot mö ama, önyuñ emen öföñidem Esie esine, önyuñ ösukhöre etie ñko, Enye ödöhö mö, ete, Nte mbufo emefiök se Ami 'namde
 13 ye mbufo ? Mbufo ekot Mi ète, Andikpep ye Öböñ : ndien mbufo emetim ödöhö ; koro Ami ndide ntre.
 14 Edieke Ami ndien, Öböñ ye Andikpep, nyetde mbufo
 15 ukot, mbufo nde nde ekpeyet ukot kiet eken. Koro Ami 'ma ñwut mbufo ido, man mbufo nde ekpenam kpa
 16 nte Ami 'namde ye mbufo. Kakpan ke ndöhö mbufo, nte, asañutom ikponke ikan Ète ufök esie ; isuñutom
 17 inyuñ ikponke ikan andidön enye. Mbufo ema efiök me-ñkpö emi, öföfön önö mbufo edieke mbufo enamde mö.
 18 Ami ndöhöke mbaña kpukpru mbufo : Ami möfiök mö

JOHN 13.

- emi 'mekde : edi man se ewetde osu ete, Enye emi adiade
 19 udia Mi ama emenere nditiñ-ikpat esie atiga Mi. Toto
 ke ini emi modöhö mbufo ke ñkpö emi mika-itibeke
 kaña, man, kini otibede, mbufo enim ke akpanikö ete,
 20 Ami ndi *Enye*. Kakpan ke ndöhö mbufo, nte, Enye emi
 onyimedede owo ekededi emi Ami ndidöñde onyime Mi;
 ndien enye emi onyimedede Mi onyime Enye emi öködöñde
 Mi.
- 21 Ke Jesus ama öködöhö ntem, Enye ofukhö ke
 spirit, önyuñ ösöñ uyo ödöhö ete, Ami motim ndöhö
 22 mbufo, nte, owo mbufo kiet eyetap Mi. Mbet Esie ese
 23 kiet eken, eyik owo eke Enye ödöhöde abaña. Owo mbet
 Esie kiet emi Jesus amade odu ke okpokoro emi eberede
 24 ke ikpanesit Jesus. Simon Peter ofuñ ubök önö enye,
 25 ete, Sian nyin owo emi Enye etiñde abaña. Enye
 ke eberede ke ikpanesit Jesus, kpa nte eketiede,
 26 ödöhö Enye, ete, Edi anie, Öböñ? Ndien Jesus öbörö
 ete, Edi enye emi Ami ndinöde uyo, kini ndebide enye.
 Ntre ke Enye ama ekedebi uyo, Enye ada önö Judas,
 27 eyen Simon Iscariot. Ndien ke enye ama ököbö uyo
 oro, Satan oduk ke esit esie. Ndien Jesus ödöhö enye,
 28 ete, Se afo oyomde ndinam, nam iwiwa. Edi baba owo
 kiet ke okpokoro ifiökke ntak eke Enye ödöhöde enye
 29 ntem. Koro ndusuk owo ekerede ete, oto koro Judas
 akamade ekpat, Jesus ödöhö enye, ete, Dep ñkpö eke
 nyin idiyomde ke abaña usörö; me, nte enye ökpönöde
 30 ubuene ñkpö. Ndien ke enye öböde uyo oro ndo ndo oro
 enye öwörö : ndien ekedi okoneyo.
- 31 Ke enye ama ököwörö, Jesus ödöhö ete, Kemi
 ekpono Eyen owo, Abasi önyuñ ada ukpono ke Enye;
 32 Abasi eyenyuñ okpono Enye ke Idemesie, eyenyuñ
 33 okpono Enye idaha kiet. Ñkpri nditö Mi, Ami nsuk
 ndodu ye mbufo ke ini esisit. Mbufo eyeyom Mi : ndien
 nte Ami ndöhöde Me-Jew, nte, Ebiët emi Ami ñkade,
 mbufo ikemeke ndidi; kpa ntre ke Ami ndöhö mbufo
 34 kemi. Öbufa ibet ke Ami 'nö mbufo, nte, mbufo ëma
 kiet eken; mbufo ënyuñ ëma kiet eken kpa nte Ami
 35 'made mbufo. Kpukpru owo eyeda emi ëfiök ete mbufo
 edi mbet Mi, ke mbufo ëma ëma kiet eken.
- 36 Simon Peter ödöhö Enye, ete, Ebiët ewe ke Afo akaka?
 Jesus öbörö ete, Ebiët eke Ami ñkade, afo ukemeke
 37 nditiene Mi kemi; edi afo eyeticne Mi usuk usuk. Peter

JOHN 14.

ödöhö Enye, ete, Öböñ, nsinam ami meñkemeke nditiene
 38 Fi kemi? Nyeduök uwem mi kabaña Fi. Jesus öbörö
 ete, Nte afo eyeduök uwem fo kabaña Mi? Kakpan ke
 ndöhö fi, nte, Ekikö idikpökke, tutu afo akañ Mi
 utim ikata.

14 ÈKUYAK esit etimere mbufo: mbufo èbuöt idem ye
 2 Abasi, èbuöt idem ye Ami ñko. Ke ufök Ète Mi ediwak
 ebiët iduñ èdu; mikpedige ntre, Ami ñkpödöhö mbufo:
 3 koro Ami möñ ñka nditim itie 'nö mbufo. Ndien Ami 'ma
 ñka 'nyuñ ntim itie 'nö mbufo, nyetönö ntak ndi, 'nyuñ nda
 mbufo ke Idemmi; man ke ebiët eke Ami ndude, mbufo
 4 èdu ñko. Ndien ebiët eke Ami ñkade, mbufo èmefiök
 5 usuñ. Thomas ödöhö Enye, ete, Öböñ, nyin ifiökke ebiët
 6 eke Afo akade; didie ke nyin ifiök usuñ? Jesus ödöhö
 enye, ete, Ami ndi usuñ, ye akpanikö, ye uwem: baba owo
 7 kiet itieneke Ète iböhöke ke Ami. Mbufo èma èkpefiök
 Mi, mbufo èkpenyuñ èfiök Ète Mi ñko: toto ke ini
 8 emi mbufo èmefiök Enye, ènyuñ èkut Enye. Philip
 ete Enye, Öböñ, wut nyin Ète, ndien oro ekem nyin.
 9 Jesus ete enye, Nte Ami modu ye mbufo adaña anyan
 ini emi, ndien afo ufiökke Mi, Philip? owo ama okut
 10 Mi okut Ète; didie ke afo ödöhö ete, Wut nyin Ète? Nte
 afo unimke ke akpanikö, ete, Ami ndu ke Ète, ye Ète ke
 Ami? ikö oro Ami ndöhöde mbufo ndöhöke oto ke
 Idemmi: edi Ète emi odude kesit Mi anam utom Esie.
 11 Ènim uyo Mi ke akpanikö ète, Ami ndu kesit Ète, ye Ète
 kesit Mi: midige ntre ènim Mi ke akpanikö kabaña idem
 12 utom. Kakpan ke ndöhö mbufo, nte, Enye emi öbuötde
 idem ye Ami, utom eke Ami 'namde ke enye edinam ñko;
 enye eyenyuñ anam utom emi okponde akan me mö emi:
 13 koro Ami ntienede Ète. Ndien ñkpö ekededi eke mbufo
 èdibeñede ke enyiñ Mi, oro ke Ami ndinam, man Ète
 14 enyene ukpono ke Eyen. Mbufo èma èbeñe ñkpö ke
 15 enyiñ Mi, Ami nyenam oro. Edieke mbufo èmade Mi,
 16 mbufo èyenim mbet Mi. Ndien Ami nyekpe Ète ubök,
 Enye eyenyuñ önö mbufo Iberedem efen, man Enye
 17 odu ye mbufo ke nsinsi, kpa Spirit akpanikö: emi
 ererimbot mikemeke ndinyime; koro mique Enye,
 minyuñ ifiökke Enye: mbufo èmefiök Enye; koro Enye
 18 odude ye mbufo, edinyuñ odude ke esit mbufo. Ami
 ndikpönke mbufo nte nditö-akpa: Ami nyetiene mbufo.

JOHN 15.

19 Osuk ekpri ini esisit, ndien ererĩmbot ique Mi aba ; edi
 mbufo ěkut Mi : koro Ami ndude uwem, mbufo ěyenyuñ
 20 ědu uwem ñko. Ke usen oro mbufo ěyefiök ěte Ami ndu
 21 ke ěte Mi, ye mbufo ke Ami, ye Ami ke mbufo. Enye
 emi enyenede mbet Mi, önyuñ onĩmde mö, edi enye ama
 Mi : ndien enye emi amade Mi, ěte Mi eyema enye, Ami
 nyenyuñ 'ma enye, nyenyuñ nyarare Idemmi 'nö enye.
 22 Judas (idige Iscariot) ödöhö Enye, ete, Öböñ, nsinam Afo
 ediyararede Idemfo önö nyin, edi unöñö ererĩmbot ?
 23 Jesus öbörö enye, ete, Edieke owo amade Mi, enye
 eyenĩm ikö Mi : ndien ěte Mi eyema enye, nyin iyenyuñ
 24 itiene enye, inyuñ iduñ ye enye. Enye emi mimaña Mi
 inĩmke ikö Mi : ndien ikö oro mbufo ěkopde idige
 okĩmmö, edi eke ěte emi öködöñde Mi.
 25 Ami 'ma ndöhö mbufo ñkpö emi kini ndude ye
 26 mbufo *kaña*. Edi Iberedem, kpa Edisana Spirit, emi
 ěte edidöñde ke enyiñ Mi, Enye eyekpep mbufo kpukpru
 ñkpö, eyenyuñ anam mbufo ěti kpukpru ñkpö oro Ami
 27 ñködöhöde mbufo. Emem ke Ami ñkpöñ 'nö mbufo ;
 emem Mi ke Ami 'nö mbufo : idige nte ererĩmbot önöde ke
 Ami 'nö mbufo. ěkuyak esit etĩmere mbufo, ěkunyũ
 28 ěfeghe ndik. Mbufo ěma ěkop nte Ami ñködöhöde
 mbufo, nte, Ami möñ 'nyöñ, 'nyuñ mfiak ntiene mbufo.
 Edieke mbufo ěmade Mi, mbufo ěkpedara, koro Ami
 29 ntienede ěte : koro ěte okponde akan Mi. Ndien kemi
 Ami 'ma ndöhö mbufo ke ñkpö emi mika-itĩbeke *kaña*, man,
 30 kini ětĩbede, mbufo ěnĩm ke akpanikö. Ndöhöke aba
 ediwak ikö ye mbufo, koro Öböñ ererĩmbot emi ke edi :
 31 enye inyuñ inyeneke baba ñkpö kiet kesit Mi ; edi man
 ererĩmbot ěfiök ěte Ami 'mama ěte, ndien nte ěte ökönöde
 Mi item, kpa ntre ke Ami 'nam. ědakha kenyöñ, ěyak
 nyin iwörö ke ebiēt emi.

15 Ami ndi ata vine, ndien ěte Mi edi andikpeme iñwañ.
 2 Kpukpru ñkök kiet kiet kesit Mi emi miñwomke mfri,
 Enye osĩbe efep, ndien kpukpru ñkök kiet kiet emi
 oñwomde mfri, Enye ödödiöñ, man enye oñwom mfri
 3 awak akan. Kemi mbufo ěmesana oto ke ikö emi
 4 Ami ndöhöde mbufo. ědu kesit Mi, Ami 'nyuñ ndu kesit
 mbufo. Nte ñkök mikemeke ndiñwom mfri ke idemesie,
 iböhöke enye odu ke vine ; kpa suk ntre mbufo inyuñ
 5 ikemeke, iböhöke mbufo ědu kesit Mi. Ami ndi vine,

JOHN 15.

mbufo *ēdi* me-*ñkōk*: Enye emi odude kesit Mi, Ami 'nyuñ ndude kesit esie, kpa enye oñwom ediwak mfri: koro ke eridianare ye Ami mbufo ikemeke ndinam *ñkpō*.

6 Edieke owo miduhe kesit Mi, *ēduōk* enye nte *ñkōk*, enye önyuñ eyemere; ndien *ētañ* mö *ēsīn* ke *ikañ*, *ēnyuñ* *ēföp*

7 mö. Mbufo *ēma* *ēdu* kesit Mi, *ikō* Mi ama önyuñ odu kesit mbufo, *ēbeñe* *ñkpō* ekededi eke mbufo *ēyeyom*,

8 ndien *ēyenam* *ēnō* mbufo. Ke *ñkpō* emi *Ète* Mi enyene ukpono, emi mbufo *ēñwomde* ediwak mfri; ndien ntre ke

9 mbufo *ēdidi* mbet Mi. Kpa nte *Ète* amade Mi, ke Ami

10 'nyuñ 'ma mbufo: *ēsuk* *ēdu* ke ima Mi. Mbufo *ēma* *ēnīm* mbet Mi, mbufo *ēyedu* ke ima Mi; kpa nte Ami

11 'nīmde mbet *Ète* Mi, 'nyuñ ndude ke ima Esie. Me-*ñkpō* emi ke Ami *ndōhō* mbufo, man idaresit Mi odu kesit mbufo,

12 *man* idaresit mbufo önyuñ *öyōhō*. Emi edi ibet Mi, ete,

13 mbufo *ēma* kiet eken kpa nte Ami 'made mbufo. Baba owo kiet inyeneke ima eke okponde akan emi, nte owo

14 *önōde* uwem esie kabaña mufan esie. Mbufo *ēdi* mufan Mi, ke mbufo *ēnamde* me-*ñkpō* eke Ami ntemede mbufo.

15 *Ñkotke* aba mbufo *ifn*; koro ofn mifiökke se *ēte* esie anamde: edi *ñkot* mbufo mufan; koro Ami 'ma *nsian* mbufo *kpukpru* *ñkpō* oro Ami *ñkopde* oto

16 ke *Ète* Mi. Mbufo ikemekke Mi, edi Ami *ñkemek* mbufo, 'nyuñ 'nīm mbufo, man mbufo *ēka* *ēkeñwom* mfri, man mfri mbufo önyuñ *ebīgi*: man *ñkpō* ekededi eke mbufo *ēdibeñede* *Ète* ke enyiñ Mi, Enye *ökpönō* mbufo.

17 Me-*ñkpō* emi ke Ami *ñwuk* mbufo, nte, mbufo *ēma* kiet

18 eken. Edieke ererimbot *ēsua* mbufo, mbufo *ēmefiök*

19 *ēte* mö *ēkebem* iso *ēsua* Mi ndien *ēsua* mbufo. Mbufo *ēkpedi* eke ererimbot, ererimbot *ēkpema* *esiemō*: edi koro mbufo midige eke ererimbot, edi Ami *ñkemek* mbufo

20 *nsio* ke ererimbot, ntem ke ererimbot *ēsua* mbufo. *Èti* *ikō* oro Ami *ñkōdōhōde* mbufo, nte, ofn ikponke ikan *ēte* esie. Edieke mö *ēkekōböde* Mi, *ēyekōbö* mbufo *ñko*; edieke mö *ēkenīmde* *ikō* Mi, *ēyenīm* eke

21 mbufo *ñko*. Edi *kpukpru* *ñkpō* emi ke mö *ēdinam* ye mbufo kabaña enyiñ Mi, koro mö mifiökke Enye emi

22 *ökōdōñde* Mi. Edieke Ami *meñkpedige* 'nyuñ *ntiñ* ye mö, mö ikpenyeneke *idiōñkpō*: edi kemi mö inyeneke se *ēkpe-*

23 *börōde* *ēbaña* *idiōñkpō* mö. Enye emi *asuade* Mi *asua* *Ète*

24 Mi nde. Ke Ami *meñkpanamke* kotu mö me-utom eke baba owo efen *mikanamke*, mö ikpenyeneke *idiōñkpō*:

JOHN 16.

edi kemi mö ěma ěkut ěnyuñ ěsua Mi ye Ěte Mi nde.
 25 Edi *ñkpö emi* öwörö, man ikö oro ěwetde ke ibet mö osu,
 26 ěte, Mö ěkesua Mi ke ikpikpu. Edi kini Iberedem
 edide, emi Ami ndidöñde etiene mbufo oto ke Ěte,
 kpa Spirit akpanikö emi otode ke Ěte, Enye eyetĩñ ikö
 27 ntiense abaña Mi: mbufo ěnyuñ ětĩñ ikö ntiense ñko,
 koro mbufo ěma ěkedu ye Ami toto ke eritöñö.

16 MIKÖ emi ke Ami ndöhö mbufo, man ěkusĩn mbufo
 2 ěduö. Mö ěyebĩn mbufo ěfep ke me-synagogue: ini ke
 önyuñ edi eke owo ekededi emi ediwoťde mbufo edikerede
 3 ete, imö inam ñkpö inö Abasi. Ndien mö ěyenam me-
 4 ñkpö emi, koro mö mifiökke Ěte, me Mi. Edi Ami
 'ma ndöhö mbufo me-ñkpö emi, man kadañemi ini mö
 edide, mbufo ěkpeti mö, ěte, Ami 'ma ndöhö mbufo.
 Ndien Ami ñkodöhöke mbufo me-ñkpö emi toto ke eritöñö,
 5 koro Ami ñkodude ye mbufo. Edi kemi Ami möñ ntiene
 Enye emi ökodöñde Mi; ndien baba owo mbufo kiet
 6 ibupke Mi, ite, Afo aka möñ? Edi koro Ami ndöhöde
 mbufo me-ñkpö emi, mfukhö ömöyöhö ke esit mbufo.
 7 Edi Ami ndöhö mbufo akpanikö; nte, öfön ye mbufo
 nte Ami 'nyöñde: koro ke Ami menyöñke, Iberedem
 iditieneke mbufo; edi Ami 'ma 'nyöñ, nyedöñ Enye etiene
 8 mbufo. Ndien Enye, kini Enye edide, eyenam ikpe
 obiom ererĩmbot kabaña idiöñkpö, ye edinen ido, ye ikpe:
 9 kabaña idiöñkpö, koro mö minĩmke Mi ke akpanikö;
 10 kabaña edinen ido, koro Ami ntienede Ěte, ndien mbufo
 11 ique Mi aba; kabaña ikpe, koro ěma ěkpe ikpe öböñ
 12 ererĩmbot emi. Ami menyene kaña ediwak ikö ndidöhö
 13 mbufo, edi mbufo ikemeke ndikop mö kemi. Edi kadañemi
 Enye, kpa Spirit akpanikö, ama edi, Enye eyeteme mbufo
 ěsaña ke öfuri akpanikö: koro Enye miditĩñke ito ke
 Idemesie; edi Enye eyetĩñ ñkpö ekededi eke Enye okopde:
 14 Enye eyenyuñ asian mbufo ñkpö eke ědidide. Enye
 eyekpono Mi: koro Enye edidade okĩmmö asian mbufo.
 15 Kpukpru ñkpö ekededi eke Ěte enyenede ědi okĩm: ntre
 ke Ami ndöhö nte, Enye edida se edide okĩm, eyenyuñ
 16 asian mbufo. Ke ekpri ini esisit, ndien mbufo idique Mi
 aba, ndien ke ekpri ini esisit ñko, mbufo ěyenyuñ ěkut Mi.
 17 Mödo *ndusuk* mbet Esie ědöhö kiet ye eken, ěte, Nso ke
 Enye ödöhö nyĩn ntem, ete, Ke ekpri ini esisit, ndien
 mbufo idique Mi; ndien ke ekpri ini esisit ñko mbufo

JOHN 17.

18 eyenyuñ ekut Mi: Koro Ami ntienede Ète? Ndien
 mö ödöhö ète, Nso ke Enye ödöhö ntem, ete, Ekpri ini
 19 esisit? Nyin ifiökke se Enye ödöhöde. Jesus öfiök ete
 mö eyom ndibup Enye, ndien Enye ödöhö mö, ete, Nte
 mbufo ke ebume kotu mbufo kabaña ñkpö emi Ami
 ndöhöde, nte, Ke ekpri ini esisit, ndien mbufo idique
 Mi, ndien ke ekpri ini esisit ñko, mbufo eyenyuñ ekut
 20 Mi? Kakpan ke ndöhö mbufo, nte, mbufo eyetuaña
 enyuñ eseme, edi ererimbot eyedara: mbufo eyefukhö,
 21 edi mfukhö mbufo eyekabare edi idara. Kini uman
 otukde ñwan enye odu ke mfukhö, koro ini esie ekemde:
 edi kini enye amande eyen ama, enye itihi aba ndutukhö,
 oto ke idara koro eyen eren amanade oduk ke ererimbot.
 22 Mödo mbufo edu ke mfukhö kemi: edi Ami nyetöñö ntak
 ñkut mbufo, ndien esit eyedat mbufo, ndien baba owo kiet
 23 idiböhö mbufo idara mbufo. Ndien ke usen oro mbufo
 idibupke Mi baba ñkpö kiet. Kakpan ke ndöhö mbufo,
 nte, Mbufo ema ebeñe Ète ñkpö ekededi, Enye eyenö
 24 mbufo ke enyiñ Mi. Tutu osim emi mbufo ibeñeke kaña
 ñkpö ke enyiñ Mi: ebeñe, ndien mbufo eyebö, man
 idara mbufo öyöhö.
 25 Mikö emi ke Ami ndöhö mbufo ke ñke: ini ke edi
 eke Ami mendidöhöke mbufo aba ke ñke, edi nyetim
 26 nsian mbufo mbaña Ète. Ke usen oro mbufo eyebeñe ke
 enyiñ Mi: ndien Ami ndöhöke nte, nyekpe Ète ubök 'nö
 27 mbufo; koro Ète ke Idemesie amama mbufo, koro mbufo
 ekemade Mi, ekenyuñ enimde ke akpanikö ète, Ami nto
 28 ke Ète ñwörö. Ami ñkoto ke Ète, 'nyuñ ndi ke ererimbot:
 29 Ami ñkpöñ ererimbot ñko, 'nyuñ ntiene Ète. Mbet Esie
 ödöhö ète, Sese, kemi Afo ototim asian, unyuñ udöhöke ke
 30 ñke. Kemi nyin imöfiök ite, Afo öfiök kpukpru ñkpö,
 unyuñ uyomke owo obup Fi: nyin ida emi inim ke
 31 akpanikö ite, Afo okoto ke Abasi öwörö edi. Jesus öbörö
 32 mö, ete, Nte mbufo emenim ke akpanikö kemi? Sese,
 ini ke edi, önyuñ ededi ama, eke mbufo edisuanade,
 kpukpru owo kiet kiet ke ebiët esiemö, enyuñ ekpöñ Mi
 ikpöñ: edi Ami nduhe ikpöñ, koro Ète odude ye Ami.
 33 Ami mödöhö mbufo me-ñkpö emi, man mbufo enyene
 emem ke Ami. Ke ererimbot mbufo eyekut ukut: edi
 esöñ esit; Ami 'ma ñkan ererimbot.

17 JESUS ödöhö ikö emi; ndien emenere enyin Esie

JOHN 17.

ese enyöñ, ödöhö ete, Ète, ini edi; kpono Eyen Fo,
2 man Eyen okpono Fi: kpa nte Afo ökönöde Enye odudu
ndikara kpukpru öbukidem, man owo ekededi emi Afo
3 ökönöde Enye, Enye ökpönö mö nsinsi uwem. Ndien
emi edi nsinsi uwem, nte mö ekpefiökde Fi ata Abasi
kierakiet, ye Enye emi Afo öködöñde, kpa Jesus Christ.
4 Ami ñkokpono Fi ke isöñ, ke 'ma ñkanam utom emi Afo
5 ökönöde Mi ete 'nam. Ndien kemi, O Ète, kpono Mi
ke ñkañ Fo ye ukpono eke Ami ñkenyenede ye Afo ke
6 ererĩmbot mika-iduhe kaña. Ami ñkayarare enyĩñ Fo
'nö me-owo eke Afo okosiode ke ererĩmbot önö Mi: mö
ekedi Okuo, ndien Afo akada mö önö Mi; ndien mö ëma
7 ënĩm ikö Fo. Kemi mö ëfiök ète, kpukpru ñkpö ekededi
8 eke Afo ökönöde Mi èto Fi: koro Ami 'ma 'nö mö
me-ikö emi Afo ökönöde Mi; ndien mö ënyĩme mö,
ënyuñ ëfiök ke akpanikö ète, Ami ñkoto Fi ñwörö, mö
9 ënyuñ ënĩm ke akpanikö ète, Afo öködöñ Mi. Ami
mekpe ubök 'nö mö: mkpehe ubök 'nö ererĩmbot, edi
'nö mö oro Afo önöde Mi; koro mö ëdide Okuo:
10 ndien kpukpru ñkpö eke ëdide Okĩm edi Okuo, Okuo
ënyuñ edi Okĩm: ndien Ami menyene ukpono kesit mö.
11 Ami nduhe aba ke ererĩmbot, ndien mö ëdu ke ererĩmbot,
ndien Ami ntiene Fi. Edisana Ète, kpeme mö ke enyĩñ
Fo eke Afo ökönöde Mi, man mö edi kiet, kpa nte nyĩn
12 *idide*. Kini Ami ñkodude ye mö, Ami ñkekpeme ke enyĩñ
Fo mö eke Afo ökönöde Mi: Ami 'nyuñ ntĩn enyĩn ñkpeme
mö, ndien baba owo mö kiet itakke, ke miböhöke eyen
13 nsobo; man se ewetde okposu. Edi kemi Ami ntiene
Fi; ndien Ami ndöhö me-ñkpö emi ke ererĩmbot, man
14 mö ënyene idaresit Mi öyöhö kesit mö. Ami 'ma 'nö mö
ikö Fo, ndien ererĩmbot ësua mö, koro mö midige eke
15 ererĩmbot, kpa nte Ami mendige eke ererĩmbot. Ami
ñkpehe ubök nte, Afo okposio mö ke ererĩmbot efep, edi
16 nte Afo ekpekpeme mö ke idiök. Mö idige eke ererĩmbot,
17 kpa nte Ami mendige eke ererĩmbot. Nam mö ësana oto
18 ke akpanikö: ikö Fo edi akpanikö. Nte Afo öködöñde
Mi ke ererĩmbot, kpa ntre ke Ami ndöñ mö ëduk ke
19 ererĩmbot. Ndien kabaña mö Ami 'nam Idemmi nsana,
20 man ënam mö ke idemmö ësana ñko oto akpanikö. Ami
'nyuñ mkpehe ubök 'nö memö emi ikpöñ, edi 'nö mö emi
ëbuötde idem ye Ami ñko oto ke ikö mö; man kpukpru mö
21 edi kiet; kpa nte Afo, Ète, ke Ami, ye Ami ke Afo, man

JOHN 18.

mö ënyuñ ëdu ke nyin : man ererimbot ënim ke akpanikö
 22 ëte, Afo öködöñ Mi. Ndien ukpono eke Afo ökönöde
 Mi Ami 'ma 'nö mö ; man mö ëdi kiet, kpa nte Nyin idide
 23 kiet ; Ami kesit mö, ye Afo kesit Mi, man mö ëfön ëma
 ke eridi kiet ; man ererimbot ëfiök ëte, Afo öködöñ Mi,
 24 ökönyuñ ama mö, kpa nte Afo akamade Mi. Ète, Ami
 moyom nte, mö ñko eke Afo ökönöde Mi ëdu ye Ami ke
 ebiët eke Ami ndude ; man mö ëkut uböñ Mi, eke Afo
 ökönöde Mi : koro Afo akamade Mi ke mika-itöñöke kaña
 25 ndibot ererimbot. O edinen Ète, ererimbot ikefiökke Fi,
 edi Ami 'ma mfiök Fi ; ndien memö emi ëfiök ëte, Afo
 26 öködöñ Mi ; ndien Ami ñkayarare enyiñ Fo 'nö mö,
 nyenyuñ nyarare enye ; man ima eke Afo akamade Mi
 odu kesit mö, Ami 'nyuñ ndu kesit mö.

18 KE Jesus ama öködöhö ikö emi, Enye öwörö ye
 mbet Esie ebe idim Kidron, aka ke ötö emi iñwan mfri
 odude, eke Enye ke Idemesie ye mbet Esie ëdukde.
 2 Ndien Judas ñko, emi atapde Enye, öfiök ebiët oro, koro
 3 Jesus awakde ndika do ye mbet Esie. Ndien Judas, ke
 enye ama ököbö ikpö oku ye me-Pharisee udim owo ye
 misuñutom, edi do ye mutuenikañ ye nsarañikañ ye ñkpö
 4 eñwan. Ndien Jesus, ke öfiökde kpukpru ñkpö oro
 ëditionede Enye, öwörö önyuñ obup mö, ete, Mbufo ëyom
 5 anie ? Mö ëbörö Enye, ëte, Jesus eyen Nazareth. Jesus
 ete mö, Ami ndi Enye. Ndien Judas ñko, emi atapde
 6 Enye, ada ye mö. Ndien kini Enye ödöhöde mö, ete,
 7 Ami ndi Enye, mö ëfiak edem ëduöñö ke isöñ. Ndien
 Enye ötöñö ntak obup mö, ete, Mbufo ëyom anie ? Mö
 8 ëbörö ëte, Jesus eyen Nazareth. Jesus ödöhö ete, Ami
 'ma ndöhö mbufo, nte, Ami ndi Enye : ndien edieke mbufo
 9 ëyomde Mi, ëyak memö emi ënyöñ : man ikö oro Enye
 ödöhöde osu, ete, Memö oro Afo ökönöde Mi, Ami nduökke
 10 baba kiet. Ndien Simon Peter emi akamade ofut osio
 enye, önyuñ ekpi owo aqua oku, osibe enye utöñ
 11 nasia. Enyiñ owo oro ekere Malchus. Ndien Jesus
 ödöhö Peter, ete, Sin ofut ke efök : cup emi Ète önöde
 Mi, nte Ami ndiñwönke enye ?

12 Ntre udim oro ye akamba ëtubom, ye misuñutom me-
 13 Jew, ëmum Jesus ënyuñ ëböp Enye, ënyuñ ëbem isc ëda
 Enye ëtiene Annas ; koro enye edide ëte ñwan Caiaphas,
 14 emi edide aqua oku ke isua oro. Caiaphas edi enye emi

JOHN 18.

ökönöde Me-Jew item ete, öfön nte owo kiet akpakpade kibuot mbiobio.

15 Ndien Simon Peter etiene Jesus, mbet kiet efen önyuñ anam kpa ntre. Ndien mbet oro emi aqua oku ödiöñöde, önyuñ oduk ye Jesus ke okure aqua oku; edi Peter ada
16 ke usuñ ke esien. Ntre mbet eken emi aqua oku ödiöñöde öwörö, önyuñ ödöhö ye ñwan emi ekpemedede usuñ,
17 önyuñ ada Peter oduk. Ndien eyen-añwan oro ekpemedede usuñ ödöhö Peter, ete, Nte afo önyuñ edi mbet owo emi
18 kiet? Enye ete, Ami ndige. Ndien ifn ye misuñutom, ke ěma ěkebara ikañ ukañ, koro tuep odude, ěda do ěwebe ikañ; ndien Peter ñko odu ye mö, ada ewebe ikañ.

19 Ekem aqua oku obup Jesus abaña mbet Esie, ye erikpep
20 Esie. Jesus öbörö enye, ete, Ami 'ma ntĩñ 'nö ererĩmbot añwa añwa; kpukpru ini Ami ñkpekpep ke synagogue ye ke temple, ebiēt eke kpukpru Me-Jew ěbonode ötö
21 kiet; ndien Ami ntĩñke baba ikö kiet ke ndĩbe. Nsinam afo obupde Mi? Bup mö emi ěkopde, se Ami ndöhöde
22 mö: sese, mö ěfiök se Ami ñködöhöde. Ndien kini Enye ama öködöhö emi, owo misuñutom kiet emi adade do amia Jesus ke ubök, ete, Afo öbörö aqua oku ntre?
23 Jesus öbörö enye, ete, Ami 'ma ndöhö se idiökde, sian idiök oro: edi 'ma ndöhö edinen, nsinam afo amiade Mi?
24 Ndien Annas önö enye ye uruk ěda ěsök Caiaphas aqua oku.

25 Ndien Simon Peter ada do ewebe ikañ. Ndien mö ödöhö enye, ěte, Nte afo edi owo mbet Esie kiet? Enye
26 akañ, önyuñ ödöhö ete, Ami ndige. Ofn aqua oku kiet, emi edide oruk ye enye emi Peter okosibede utöñ esie, ödöhö ete, Nte ami ñkeque fi ke iñwañ mfri ye
27 Enye? Ndien Peter ötönö ntak akañ: ndien idaha oro ekikö ökpök.

28 Ntem mö ěda Jesus ědakha ěkpöñ Caiaphas ěkeduk ke ufök andikara: ndien edi usenubök; ndien mö ke idemmö idukke ke ufök andikara, mbak mö ědidekhe, edi ěkpedia
29 passover. Ndien Pilate öwörö etiene mö, önyuñ ödöhö
30 ete, Nso ke mbufo ědori owo emi? Mö ěbörö enye, ěte, Edieke owo emi mikpedige anam idiöñkpö,
31 nyin ikpadaha Enye isin fi ke ubök. Ndien Pilate ödöhö mö, ete, Mbufo ke idemmbufo ěda Enye ěkpe ikpe Esie nte ibet mbufo asañade. Me-Jew ödöhö enye, ěte, ěwukhö

JOHN 19.

- 32 akpan nyin ndiwot owo ekededi : man ikö Jesus okposu eke Enye ödöhöde, owut oruk mkpa eke Enye edikpade.
- 33 Mödo Pilate ötöñö ntak oduk ke ufök andikara, önyuñ okot Jesus, önyuñ ödöhö Enye, ete, Nte Afo edi Edidem
- 34 Me-Jew ? Jesus öbörö ete, Nte afo ödöhö emi ke idemfo,
- 35 me edi owo efen ödöhö fi ñkpö emi ëbaña Mi ? Pilate öbörö ete, Nte ami ndi Jew ? Obio Fo ye ikpö oku ëda
- 36 Fi ësın ke ubök mi : Afo anam nso ? Jesus öbörö ete, Obio Mi idige eke ererimbot emi : obio Mi ekpedi eke ererimbot emi, misuñutom Mi ëkpeñwana, man ëkusın
- 37 Mi ke ubök Me-Jew : edi kemi obio Mi itoho mi. Ndien Pilate ödöhö Enye, ete, Nte Afo edi edidem ndien ? Jesus öbörö ete, Afo ömödöhö ete, Ami ndi edidem. Kabaña ñkpö emi ke Ami 'mana, kabaña ñkpö emi ke Ami 'nyuñ ndi ke ererimbot, man Ami ntññ ikö ntiense mbaña akpanikö. Kpukpru owo kiet kiet emi edide eke akpanikö
- 38 okop uyo Mi. Pilate ete Enye, Nsidi akpanikö ?
- Ndien ke enye ama öködöhö emi, enye ötöñö ntak öwörö etiene Me-Jew, önyuñ ödöhö mö, ete, Ami ñque
- 39 idiök ñkpö ye Enye. Edi mbufö ëmenyene ido, nte ami ñkpasanade owo kiet nyak 'nö mbufö ke passover : nte mbufö ëmenyime ndien ëte, ami nsana Edidem Me-Jew
- 40 nyak 'nö mbufö ? Ntem mö ëtöñö ntak ëfiori ëte, Idige owo emi, edi Barabbas. Barabbas emi edi owo ñwo.

- 19** NDIEN Pilate ada Jesus amia Enye. Ndien mbon-
- 2 eköñ ëdök anyanya ñkukim, ëyara Enye ke ibuot, ënyuñ
- 3 ësine Enye ididuot öföñidem ; ndien mö ëtiene Enye, ënyuñ ödöhö ëte, Etia, Edidem Me-Jew ! ndien mö
- 4 ëmia Enye ke ubök mö. Ndien Pilate ötöñö ntak öwörö, önyuñ ödöhö mö, ete, Sese, ami mada Enye ñwörö nsök mbufö, man mbufö ëfiök ëte, ami ñque idiök ye Enye.
- 5 Ndien Jesus öwörö edi, ayara anyanya ñkukim önyuñ
- 6 esine ididuot öföñidem. Ndien Pilate ete mö, Sese, owo oro ! Ndien kini ikpö oku ye misuñutom ëkutde Enye, mö ëfiori ëte, Ëköñ Enye ke cross, ëköñ Enye ke cross. Pilate ete mö, Mbufö ëda Enye ëkeköñ ke cross : koro
- 7 ami meñque idiök ye Enye. Me-Jew ëbörö enye, ëte, Nyin imenyene ibet, ndien nte ibet oro asañade Enye odot ndikpa, koro Enye onimde Idemesie nte Eyen Abasi.
- 8 Kini Pilate okopde ikö emi, enye ödödiöñ efeghe
- 9 ndik ; önyuñ ötöñö ntak oduk ke ufök andikara, önyuñ

JOHN 19.

ödöhö Jesus, ete, Afo oto mön ? Edi Jesus inönö enye
 10 ibörö. Ndien Pilate ödöhö Enye, ete, Nte Afo uböröke
 Mi ikö ? ufiökke ete, ami menyene odudu ndisana Fi nyak,
 11 mönyuñ 'nyene odudu ndikön Fi ke cross ? Jesus öbörö
 enye, ete, Afo ukpenyeneke odudu ndinam Mi ñkpö, ke
 minönö fi oto ke enyön : mödo enye emi adade Mi esin
 12 fi ke ubök enyene idiönkpö eke okponde akan. Ndien
 Pilate oyom ndisana Enye nyak : edi Me-Jew efiori ète,
 afo ama asana owo emi ayak, afo udige ufan Cæsar :
 kpukpru owo kiet kiet emi onimde idemesie ke edidem
 13 ödöhö se abiatde Cæsar. Kini Pilate okopde ikö
 emi, enye ada Jesus öwörö, önyuñ etie ke itie-ikpe
 ke ebiët emi ekerede Isön-itiat, edi ke Hebrew, ekere
 14 Gabbatha. Edi usen editim ñkpö passover : edi ñkpö
 nte ñkanika itiokiet. Ndien enye ödöhö Me-Jew, ete,
 15 Sese, Edidem mbufo ! Ndien mö efiori ète, Men Enye
 fep, men Enye fep, kön Enye ke cross. Pilate ete mö,
 Nte ami ndikön Edidem mbufo ke cross ? Ikpö oku
 ebörö ète, Nyin inyeneke edidem ke miböhöke Cæsar.
 16 Ndien enye ayak Enye önö mö, ete, ekön Enye ke cross.
 17 Mödo mö èda Jesus : ndien Enye öwörö obiom cross
 ke Idemesie, aka ke ebiët emi ekerede Ebiët Mkpökpörö,
 18 emi èkotde enye ke Hebrew, Golgotha : ebiët eke èkönde
 Enye ke cross, ye owo iba efen ye Enye, kiet ke ubök
 19 kiet, kiet ke ubök eken, ye Jesus ke uföt. Ndien Pilate
 ewet ñwed eridori enyìn, önyuñ adian ke cross. Ndien
 ewet ète, JESUS EYEN NAZARETH, EDIDEM ME-JEW.
 20 Ediwak Me-Jew èkot ñwed eridori enyìn emi : koro ebiët
 emi èkönde Jesus ke cross ekpere obio : ndien ewet enye
 21 ke Hebrew, ye Latin, ye Greek. Ndien ikpö oku Me-
 Jew ödöhö Pilate, ète, Kuwet ete, Edidem Me-Jew, edi,
 22 nte Enye ödöhöde ete, Ami ndi Edidem Me-Jew. Pilate
 öbörö ete, Se ami ñwetde 'ma ñwewet.
 23 Ndien mbon-ekön, kini mö ëma ekekön Jesus ke cross,
 èda edisine-ñkpö Esie ebakhare ke itie inañ, önö owo-
 ekon kiet itie kiet, owo ekon kiet itie kiet ; ye öfönidem
 Esie ñko : edi öfönidem Esie inyeneke ituak, ètönö ke
 24 enyön èdök enye öfuri. Ndien mö ödöhö kiet ye eken,
 ete, Eyak nyin ikusiak enye, edi isin afia owo eke enye
 edinyenede : man se ewetde okposu ète,
 Mö edeme edisine-ñkpö Mi ke idemmö,
 Enyuñ esin afia ëbaña öfönidem Mi.

JOHN 19.

- 25 Ntem ke mbon-ekõñ ãnam ñkpõ emi. Ndien eka Jesus, ye eyen-eka eka Esie añwan, Mary ñwan Clopas, ye Mary
- 26 Magdalene ãda ãkpere cross Esie. Ndien kini Jesus okutde eka Esie ye mbet emi Enye amade ãdade do,
- 27 Enye ãdõhõ eka Esie, ete, Ñwan, Se, eyen fo ! Ndien Enye ãdõhõ mbet oro, ete, Se, uka ! Ndien ãtõñõde ke ñkanika oro mbet oro ada enye ãnyõñ ke ufõk esiemõ.
- 28 Ke emi ebede, Jesus, ke õfiõkde ete ãnam kpukpru ñkpõ ãma, man se ãwetde okposu, ãdõhõ ete, Itõñ asat Mi.
- 29 Ëma ãnim otu emi ãyõhõde ye vinegar do : ntre mõ ãwuk ndõbõ emi ãyõhõde ye vinegar ke hyssop, ãnyuñ
- 30 ãdian ke inua Esie. Kini Jesus atabide vinegar, Enye ãdõhõ ete, Okure : ãnyuñ onuk ibuo Esie, ayak ukpõñ Esie.
- 31 Ndien Me-Jew, koro edide usen editim ñkpõ, man mokpo ãkudu ke cross ke sabbath (koro sabbath oro edide akamba usen), ãbeñe Pilate, ãte, ãbuñ ukot mõ,
- 32 ãnyuñ ãmen mõ ãfep. Ndien mbon-ekõñ ãdi ãdibuñ ukot akpa owo, ye eke enye eken emi ãkõñde ke cross ye
- 33 Enye : edi kini mõ ãsimde Jesus, ãnyuñ ãkutde ãte,
- 34 Enye akpa ama, mõ ibuñke Enye ukot : edi owo mbon-ekõñ kiet okim Enye ke ñkañ ke eduat, ndien
- 35 ndo ndo oro iyip ye mõñ ãwõrõ. Ndien enye emi okutde etãñ ikõ ntiense, ndien ikõ ntiense esie edi akpanikõ : ndien enye õfiõk ete enye ãdõhõ akpanikõ, man mbufo ñko
- 36 ãnim ke akpanikõ. Koro me-ñkpõ emi ãwõñõ, man se ãwetde okposu, ãte, Òkpõ Esie baba kiet idibuñõke.
37. Ndien ñko ãwet ke ebiët efen ãte, Mõ ãyese Enye emi mõ ãkekimde.
- 38 Ndien ke me-ñkpõ emi ãbede, Joseph eyen Arimathæa, emi edide owo mbet Jesus, edi ke ndibe oto ke ndik Me-Jew, ebeñe Pilate, ete, imen okpo Jesus ifep : ndien Pilate onyime. Ndien enye edi edimen okpo Esie efep.
- 39 Nicodemus ãnyuñ edi ñko, enye emi ke mbemiso eketienede Enye ke okoneyo, ada mbuakha myrrh ye aloes,
- 40 emi udop esie edide ñkpõ nte pound ikie edi. Ntre mõ ãda okpo Jesus ãnyuñ ãwañ enye ke õfõñ linen, ãnyuñ ãsìn
- 41 ufuõñkpõ, nte Me-Jew ãkam ãbukde owo. Ndien ke ebiët eke ãkõñde Enye ke cross iñwañ mfri odu, õbufa udi ãnyuñ odu ke iñwañ mfri oro, eke akananam minimke
- 42 kaña baba owo kiet. Do ke mõ ãnim Jesus kabaña usen eritim ñkpõ Me-Jew, (koro udi ekperede).

JOHN 20.

- 20 EKEM ke akpa *usen* urua Mary Magdalene abak edi ke udi, ke ñkīm-ñwaña, ònyuñ okut nte mö ëma ëkemen
- 2 itiat ke udi ëfep. Ndien enye efeghe etiene Simon Peter, ye mbet efen oro Jesus amade, ònyuñ òdöhö mö, ete, Mö ëma ëmen Òböñ ke udi ëfep, ndien nyin ifiökke ebiët eke
- 3 mö ënimde Enye. Ndien Peter ye mbet eken oro ëwöñö
- 4 ëka ke udi. Ndien mö mbiba ëfeghe òtö kiet : ndien mbet eken oro efeghe ebe Peter, ònyuñ ebem iso osim udi ;
- 5 ndien ònukhö ese, okut òföñ linen anade, edi enye
- 6 idukke. Ndien Simon Peter etiene enye edi ñko, ònyuñ
- 7 oduk ke udi ; ndien enye okut òföñ linen nte anade, ye òföñ emi òkóböböde ke ibuot Esie, nte minañia ye òföñ linen, edi ëfut enye ënim ke ebiët kiet ke idemesie.
- 8 Ndien mbet eken ñko emi ebemde iso osim udi oduk,
- 9 ndien enye okut ònyuñ onim ke akpanikö. Koro mö mifiökke kaña se ëwetde ëte, Enye enyene ndiset ke mkpa.
- 10 Ntem mbet oro ëdakha ënyöñ ke ufök mö.
- 11 Edi Mary ada ekpere udi atua eyet : ntre, nte enye
- 12 atuade eyet, enye ònukhö ònyuñ ese kesit udi ; ònyuñ okut angel iba ye afia edisine-ñkpö ëtiede, kiet ke ibuot,
- 13 kiet ke ukot, ke ebiët eke okpo Jesus akanade. Ndien mö ëte enye, Ñwan, afo atua nso ? Enye òbörö mö, ete, Koro mö ëmende Òböñ mi ëfep, ndien ami mfiökke ebiët eke mö
- 14 ënimde Enye. Ke enye ama òködöhö ntem, enye akabare idem, ònyuñ okut Jesus adade, edi ifiökke ite edi Jesus.
- 15 Jesus ete enye, Ñwan afo atua nso ? afo oyom anie ? Enye ese ete Enye edi andikpeme iñwañ, òdöhö Enye, ete, Òböñ afo ama emen Enye efep, sian mi ebiët eke afo onimde
- 16 Enye, ndien ami nyemen Enye mfep. Jesus ete enye, Mary. Enye akabare idem ònyuñ òdöhö Enye ke usem Hebrew,
- 17 ete, Rabboni ; oro edi, Andikpep. Jesus ete enye, Kutuk Mi ; koro Ami mendökke kaña ntiene Ète : edi bine nditö-ëte Mi, nyuñ döhö mö, ete, Ami ke ndök ntiene Ète
- 18 Mi, ye Ète mbufo, Abasi Mi, ye Abasi mbufo. Mary Magdalene edi edidöhö mbet, ete, Ami 'ma ñkut Òböñ ; ye *nte* Enye ama òködöhö enye mikö emi.
- 19 Ke mbubreyo *usen* oro, akpa *usen* urua, kini ëma ëkeberi usuñ ke ebiët oro mbet ëbonode oto ke ndik Me-Jew, Jesus edi edida ke uföt, ònyuñ òdöhö mö, ete, Emem
- 20 odu ye mbufo. Ndien ke Enye òdöhöde ntem, Enye owut mö ubök Esie, ye ñkañ Esie. Ndien mbet ëdaresit
- 21 kini mö ëkutde Òböñ. Ndien Jesus òtöñö ntak òdöhö mö,

- ete, Emem odu ye mbufo. Nte Ète öködönde Mi, kpa
22 ntre ke Ami 'nyuñ ndöñ mbufo. Ndien ke Enye ama
öködöhö ntem, Enye öduök mö ibifik ke idem, önyuñ
23 ödöhö mö, ete, Mbufo ëbö Edisana Spirit : mö ekededi eke
mbufo ëfende midiöñkpö mö ënö mö, ëmefen ënö mö ;
mö ekededi eke mbufo ënimde midiöñkpö mö, ëmenim mö.
24 Edi Thomas, emi ekerede Didymus, owo mbet duopeba
25 kiet, ikoduhe ye mö kini Jesus edide. Ndien mbet eñwen
ödöhö enye, ëte, Nyin ima ikut Öböñ. Edi enye ödöhö mö,
ete, Iböhöke ami ñkut nde ökpö uquak ke ubök Esie,
'nyuñ nsin nuenubök mi ke nde ökpö uquak, 'nyuñ nsin
ubök mi ke ñkañ Esie, ami ndinimke ke akpanikö.
26 Ñko ke usen itiaeta ëbede mbet Esie ëtöñö ntak ëbono ke
ufök, Thomas önyuñ odu ye mö. Ke ëma ëkeberi usuñ
Jesus edi, ada ke uföt mö, önyuñ ödöhö mö, ete, Emem odu
27 ye mbufo. Ekem Enye ödöhö Thomas, ete, Nyan nuen-
ubök fo mi, nyuñ se ubök Mi ; nyuñ nyan ubök fo sin
ke ñkañ Mi : kunyuñ unana mbuötidem, edi nim ke
28 akpanikö. Thomas öböro Enye, ete, Öböñ mi ye Abasi
29 mi. Jesus ödöhö enye, ete, Koro afo okutde Mi, afo
omonim ke akpanikö : öföfön önö mö emi mique, ndien
ënimde ke akpanikö.
30 Jesus akanam ediwak midiöñö eñwen ke iso mbet
31 Esie, emi miwetke ke ñwed emi : edi ewet memö emi,
man mbufo ënim ke akpanikö ëte, Jesus edi Christ, Eyen
Abasi ; man ke erinim ke akpanikö mbufo ëkpenyene
uwem ke enyĩn Esie.
- 21** Ke ñkpö emi ebede Jesus ötöñö ntak ayarare Idemesie
önö mbet Esie ke inyañ Tiberias ; Enye önyuñ ayarare
2 Idemesie ntem. Simon Peter, ye Thomas emi ekerede
Didymus, ye Nathanael eyen Cana ke Galilee, ye nditö
3 Zebedee iren, ye mbet Esie iba efen edu ötö kiet. Simon
Peter ödöhö mö, ete, Ami möñ ñka ñkökö iyak. Mö ëte
enye, Nyin ñko möñ itiene fi ika. Mö ewöñö ënyuñ ëdiere
4 ke ubom ; ndien ke okoneyo oro mö imumke ñkpö. Edi ke
eyo oyomde ndisiere, Jesus ada ke esuk : edi mbet ifiökke
5 ite edi Jesus. Ndien Jesus ödöhö mö, ete, Nditö, nte
mbufo ëmenyene se ëdiade ? Mö ëböro Enye, ëte, I'ih.
6 Ndien Enye ödöhö mö, ete, Eduök iyire ke ñkañ ubom
nasia, ndien mbufo eyekut. Mö eduök, ndien kemi mö
7 ikemeke ndikot enye oto ke uwak iyak. Ndien mbet oro

JOHN 21.

Jesus amade ödöhö Peter, ete, Edi Öböñ. Ntre ke Simon
 Peter okopde ete edi Öböñ, enye awañ öföñidem esie ke
 8 idem (koro enye etiede iferi), önyuñ öduö ke inyañ. Edi
 mbet efen edi ke ekpri ubom oro (koro mö miyomke usuñ
 ye obot, edi ñkpö nte esit aba ye duop), ke ödudi iyire ye
 9 iyak. Ntre kini mö esimde ke obot, mö ekut ikañ ukañ
 10 do, ye iyak edorode kesit, ye uyo. Jesus ödöhö mö, ete,
 11 Eäda usuk iyak eke mbufo emumde kemi edi. Ntem
 Simon Peter oduk ke ubom önyuñ odudi iyire edi ke obot,
 öyöhö ye ikpö iyak, ikie ye aba ye duopeta : ndien okposuk
 12 edi nte ewakde ntem, iyire iwakhake. Jesus ödöhö mö,
 ete, Edi edidia ñkpö. Ndien baba mbet kiet inyeneke
 uko ndibup Enye, ete, Afo edi anie ? efefiök ete, edi Öböñ.
 13 Jesus edi edimen uyo önö mö, ye iyak nde. Emi anam
 14 utim ikata eke Jesus ayararede Idemesie önö mbet, ke
 Enye ama ekeset ke mkpa.
 15 Ntre ke mö ediade udia ema, Jesus ödöhö Simon Peter,
 ete, Simon, eyen John, nte afo amama Mi akan memö emi ?
 Enye öbörö Enye, ete, Ih, Öböñ ; Afo ömöfiök ete, ami
 mama Fi. Enye ödöhö enye, ete, Bök nditö-eröñ Mi.
 16 Enye ötöñö ntak ödöhö enye utim ikaba, ete, Simon, eyen
 John, nte afo amama Mi ? Enye öbörö Enye, ete, Ih,
 Öböñ ; Afo ömöfiök ete, ami 'mama Fi. Enye ödöhö enye,
 17 ete, Kpeme meröñ Mi. Enye ödöhö enye utim ikata, ete,
 Simon, eyen John, nte afo amama Mi ? Peter öfukhö koro
 Enye ödöhöde enye utim ikata, ete, Nte afo amama Mi ?
 Ndien enye öbörö Enye, ete, Öböñ, Afo ömöfiök kpukpru
 ñkpö ; Afo ömöfiök ete, ami 'mama Fi. Jesus ödöhö enye,
 18 ete, Bök meröñ Mi. Kakpan ke ndöhö fi, nte, Kini afo
 ekedide akparawa, afo ököböbö mböbö, önyuñ asaña aka ke
 ebiët eke afo amade : edi kini afo edisöñde, afo eyenyan
 ubök fo, ndien owo eñwen eyeböp fi mböbö, önyuñ emen
 19 fi aka ebiët eke afo mumaña. Enye ödöhö emi owut oruk
 mkpa eke enye edikponode Abasi kesit. Ndien ke Enye
 ama öködöhö ntem, Enye ödöhö enye, ete, Tiene Mi.
 20 Peter öwöñöre okut mbet oro Jesus amade ke etiene ;
 kpa enye emi ekeberede ke ikpanesit Esie ke itie-udia,
 21 önyuñ ödöhöde ete, Öböñ, anie editap Fi ? Ndien
 Peter ke okutde enye ödöhö Jesus, ete, Öböñ, owo emi
 22 edinyuñ anam nso ? Jesus öbörö enye, ete, Edieke Ami
 'made nte enye odu uwem tutu Ami ndi, afo asaña nso do ?
 23 afo tiene Mi. Ndien ikö emi akasuana kotu nditö-ète, ete,

mbet oro idikpaha : edi Jesus idöhöke enye, ite, enye idikpaha ; edi ödöhö ete, Edieke Ami 'made nte enye odu uwem tutu Ami ndi, afo asaña nso do ?

24 Emi edi mbet oro etĩnde ikö ntiense abaña me-ñkpö emi, önyuñ ewetde me-ñkpö emi : ndien nyin imöfiök ite ikö ntiense esie edi akpanikö.

25 Ndien ediwak ñkpö eñwen eke Jesus akanamde ënyuñ ëdu, emi ekpedi nte ewetde mö kpukpru kiet kiet, etie mi nte kpa idem ererĩmbot ikpekemeke ndikama me-ñwed eke ëkpewetde.